

續文獻通考

卷五五——五八

7保 4
5266
70-16



門保
號 5266
卷 70-16

續文獻通考卷之五十五

皇明進士雲間王圻纂輯

學校考 太學

宋理宗紹定二年臣寮言國子監內外學校之官令於士子程課之外廸以義理之學勵以行誼之實從之又奏近年士習萎蕪乞申飭胄監師儒之官專意訓導使之痛習經傳考訂義理課試選論須合體格去浮華之弊轉移士風從之 端平二年詔榮文恭王府皇后宅置教授各一員皇后宅可依紹興舊典四姓小侯立五經師之遺意三省并行省參酌以聞 淳祐六年詔曰朕臨朝願治每念乏才有意作成既親書扁題分賜諸學

并賜諸生束帛以示激勵其令二三學官於前廊長輪
及齋生中公舉經明行修氣節之士別議旌賞京學如
之

度宗咸淳八年詔加太學餐錢寬科場恩例從賈似道之
請也

丘氏濬曰處士橫議必在國家未造當隆盛時無此事
也方漢盛時無有所謂浮議也而黨錮之興乃在桓靈
之世宋時忠厚立國不殺士大夫當時士大夫毅然以
氣節名義爲重一遇國家有事輒明目張膽別白言之
不少顧忌往往以此得美名躋顯位不幸觸諱遭遷謫
以去及其事久論定直聲勁節亦從此益大以著士大

夫習見其然其中不逞者遂借此以爲取名之階進身
之徑其流弊之極遂至學校所養之士亦效尤之至於
景定淳祐之間朝廷任一宰執用一臺諫稍不若衆心
三學之士相率攻之必去其人而後已賈似道入相度
其不可以力勝遂以術籠絡之於是加太學餐錢寬科
場恩例三學之士啖其利而感其恩目擊似道之誤國
噤不敢出一聲甚至要君去國亦上書贊美挽留之無
所不至嗚呼三學諸生平日所以叩閣上書經臺投卷
者無非仁義之言聖賢之道至是其心迹盡露矣嗚呼
士大夫之在學校者尚知所以自守而毋蹈宋人之失
哉或曰學校之士遇國家有事上下蒙蔽之時亦可以

新文獻通考 卷之五十五
一
默與曰漢之王咸唐之何蕃宋之陳東當言而言專爲國而不爲私是固君子之所與也

宗學 寧宗嘉定七年秋七月復建宗學置博士教諭各一人弟子員百人在屬籍者三歲一試補弟子員如太學法 九年以宗學隸宗正寺

理宗淳祐元年七月詔以宗學博士諸王宮大小學教授輪日詣榮邸講授

小學 理宗嘉熙元年詔建內小學擇宗子十歲以下資質美者二三人置師教之 淳祐二年詔建內小學置教授二員選宗室子俾就學 八月詔小學開講 七年正月詔皇姪孟啓特授宜州觀察使建資善堂于內

小學置直講贊讀二員

遼

太祖時置上京國子監設祭酒司業監丞主簿 時南京立太學

聖宗統和九年八月以南京太學生員寢廣特賜水磴莊一區

道宗清寧五年詔設學養士頒經及傳疏置博士助教各一員 六年六月中京置國子監

金

海陵天德三年始置國子監定制詞賦經義生百人小學生百人以宗室及外戚皇后大功以上親諸功臣及三

品以上官兄弟子孫年十五以上者入學不及十五則取有物力家子弟年十三以上二十以下者充凡會課三日作論策一道季月私試如漢生制

章宗太和元年九月更定贍學養士法國子生人給民佃官田百八畝歲收以所入租官為掌其數

筭學 金制凡司天臺學生女直二十六人漢人五十人聽官民家年十五以上三十以下試補又三年一次選草澤人試補其試之制以宣明曆試推步及婚書地里新書試合婚安葬并易筮法六壬課三命五星之術

醫學 金制凡醫學十科大興府學生三十人餘京府二十人散府節鎮十六人防禦州十人每月試疑難以所

對優劣加懲勸三年一次試諸太醫雖不係學生亦聽試補小學 國子學及女直國子學內皆設之

元

太宗六年設國子總教及提學官以馮志常為國子學總教命侍臣子弟十八人入學

按此元置學之始也夫以一蠻夷之主金革未定即思文教之興豈夫子所謂夷狄之有君與

世祖至元六年七月癸酉立國子學 七年命侍臣子弟十有一人入學以長者四人從許衡童子七人從王恂至二十四年立國子學而定其制設博士通掌學事分教三齋生員講授經旨究正音訓上嚴教導之術下考

肄習之業復設助教同掌學事而專守一齋正錄申明
規矩督習課業凡讀書必先孝經小學論語孟子大學
中庸次及詩書禮記周禮春秋易博士助教親授句讀
音訓正錄伴讀以其次傳習之講說則依所讀之序正
錄伴讀亦以此而傳習之次日抽籤令諸生復說其功
課對屬詩章經解史評則博士出題生員具藁先呈助
教俟博士既定始錄附課簿以憑考校許衡又著諸生
入學雜儀及日用節目是年又命生員八十人入學
俾未爲定式而遵行之八年命設國子學增置司業
博士助教各一員選隨朝百官近侍蒙古人子孫及俊
秀者充生徒九月選胄子脫脫木兒等十人肄業國子

十年劉秉忠等請增置生員從之

十三年不忽木與同舍生堅童太答禿魯等請廣學制
疏畧曰堯舜禹湯文武之世莫不有學故其治隆於上
俗美於下而爲後世所法降至漢朝亦建學校詔諸生
課試補官魏武帝起自北方既定中原增置生員三千
儒學以興此歷代皆有學校之証也臣等今復取平南
之君建置學校者爲陛下陳之晉武帝嘗平吳矣始起
國子學隋文帝嘗滅陳矣俾國子學不隸太常唐高祖
嘗滅梁矣詔諸州縣及鄉並令置學及至太宗數幸國
學增築學舍至千二百間國學太學四門學亦增生員
其書算各置博士乃至高麗百濟新羅高昌吐蕃諸國

酋長亦遣子弟入學國學之內至八千餘人高宗因之
遂令國子監領六學一曰國子學二曰太學三曰四門
學四曰律學五曰書學六曰算學各置生徒有差皆承
高祖之意也然晉之平吳得戶五十二萬而已隋之滅
陳得郡縣五百而已唐之滅梁得戶六十餘萬而已乃
其崇重學校已如此况我堂堂大國奄有江嶺之地計
亡宋之戶不下千萬此陛下神功自古未有而非晉隋
唐之所敢比也然學校之政尚未全舉臣竊惜之臣等
向被聖恩俾習儒學欽惟聖恩豈不以諸色人仕宦者
常多蒙古人仕宦者尚少而欲臣等曉識世務以任陛
下之使令乎然以學制未定朋從數少譬猶責嘉禾於

數苗求良驥於數馬臣等恐其不易得也為今之計如
欲人材衆多通習漢法必如古昔徧立學校然後可若
曰未暇宜且於大都弘闡國學擇蒙古人年十五以下
十歲以上質美者百人百官子弟與凡民俊秀者百人
俾廩給各有定制選德業允備足為師表者充司業博
士助教而教育之使其教必本於人倫明於物理為之
講解經傳授以修身齊家治國平天下之道其下復立
數科如小學律書算之類每科設置教授各令以本業
訓導小學校則令誦讀經書教以應對進退事長之節
律科則專令通曉吏書書科則專令曉習字畫算科則
專令熟閑算數或一藝通然後改授或一日之間更次

爲之俾國子學官摠領其事常加點勘務要俱通仍以義理爲主有餘力者聽令學作文字日月歲時隨其利鈍各責所就功課程其勤惰而賞罰之勤者則升之上舍惰者則降之下舍待其改過則復升之暇日則聽令學射自非暇日無故不令出學數年以後上舍生學業有成就者乃聽學官保舉蒙古人若何品級諸色人若何仕進其未成就者且令依舊習學俟其可以從政然後歲聽學官舉其賢者能者使之依例入仕其中不可教者三年聽令出學凡學政因革生員增減若得不時奏聞則學無弊政而天下之材亦皆觀感而興起矣然後續立郡縣之學求以化民成俗無不可者臣等愚切

見於書聞於師者如此未敢必其可行伏望聖慈下臣此章令諸老先生與左丞王贊善等商議條奏施行臣等不勝至願帝覽之喜

翰林集賢學士程鉅夫奏曰臣聞國家天下必需才以爲用而人才之盛非自盛也全在國家教育之勤其衰也反是參之歷代可考也國家自中統建元以來中外臣寮亦時聞表表偉傑者皆自往時故老宿儒薰陶浸灌而然歷時既久以次淪謝邇來晨星寥寥無幾何矣臣不知更十餘年後人物當何如其瑣瑣也而王國論者恬不知怪視學校爲不急謂詩書爲無用不知人才盛衰張本於此蓋嘗有盲行貢舉求好秀才上意非不

經文虛道考 卷之五十五 七
諄切而妄人輒陰阻之應故事而集議凡幾作輟矣然則無怪乎選任之非才政治之不理也今已至此後當若何臣愚欲望陛下明詔有司重學校之事慎師儒之選京師首善之地尤當興建國學選一時名流爲國人矜式優以餼廩隆以禮貌四方觀感有所興起外而名都大邑教官有缺不但循常例取庸人而已必使廷臣推擇可以爲人表儀者條具奏聞今有祿可養而不置職比親民而加優視教化之興廢爲考第之殿最其諸生有經明行修者特與蠲免賦役依此降詔旨施行庶國家教育有方多士鼓舞不倦他日隨取隨足無臨事乏才之嘆天下幸甚

時各道儒司悉以曠官罷浙西道儒學提舉葉李召至京師上奏曰臣欽觀先帝詔書當創業時軍務繁夥尚招致士類今陛下混一區宇偃武修文可不作養人材以弘治道各道儒學提舉及郡教授實風化所係不宜罷請復立提舉司專令提調學官課諸生講明治道而上其成材於太學以備錄用凡儒戶徭役乞一切蠲免帝可其奏二十四年設國子監立國學監官祭酒一員司業二員監丞一員學官博士二員助教四員生員百二十人蒙古漢人各半官給紙劄飲食仍隸集賢院葉李爲尚書左丞一日從世祖至柳林奏曰善政不可以徒行人才不可以驟進必訓以德義摩以詩書使

知古聖賢行事方略然後賢良輩出膏澤下流唐虞三代咸有胄學漢唐明主數幸辟雍非爲觀美也乃薦周砥等十人爲祭酒等官凡廟學規制條具以聞帝皆從之

翰林國史院檢閱官袁楠上國學議曰成周國學之制略見於大司樂其遺禮可法者見於文王世子三代而上詳莫得而聞焉漢武表章六經興太學至後漢爲尤盛唐制微附益之而其制愈加詳密今可考也宋朝承唐之舊而國學之制日隳至於紹興國學愈廢雖名三學而國學非真國子矣夫所謂三舍法者崇寧宣和之弊也至秦檜而復增之月書季考又甚於唐明經帖括

之弊唐揚綰嘗曰進士誦當代之文而不通經史明經但記帖括或投牒自舉非虛席待賢之意宋之末造類不出此今科舉旣廢而國學定制深有典學教胄子之意倘得如唐制五經各立博士俾之專治一經互爲問難以盡其義至於當世之要務則略如宋胡瑗立湖學之法如禮樂刑政兵農漕運河渠等事亦朝夕講習庶足以見經濟之實往者朱熹議貢舉制亦欲以經說會粹如詩則鄭氏歐陽氏王氏呂氏書則孔氏蘇氏吳氏葉氏之類先儒用心實欲見之行事自宋末年尊朱熹之學唇腐舌弊止於四書之註故凡刑獄簿書金穀戶口靡密出入皆以爲俗吏而爭鄙棄清談危坐卒至國

亡而莫可救道者江南學校教法止於四書髻亂諸生相師成風字義精熟靡有遺忘一有詰難則茫然不能以對又近于宋世之末尚甚者知其學之不能通也於是大言以惑之議禮止於誠敬言樂止於中和其不涉史者謂自漢而下皆霸道其不能詞章也謂之玩物喪志又以昔之大臣見於行事者皆本於節用而愛人一語功業之成何所不可殊不知通達之深者必悉天下之利害灌膏養根非終于六經之格言不可也又古者教法春夏學干戈秋冬學羽籥若射御書數皆得謂之學非若今所謂四書而止儒者博而寡要故世常以儒詬訕由國學而化成於天下將見儒者之用不可勝

盡儒何能以病於世哉

二十五年十一月修國子監以居胄子二十七年正月勅從臣子弟入國子學

成宗元貞元年三月增置蒙古學正以各道肅政廉訪司領之
大德八年二月增置國子生初增蒙古生百員至是增置二百員選宿衛大臣子孫充之四月分教國子生於上都
是年冬始定國子生蒙古色目漢人三歲各貢一人
十年二月營國子學于文宣王廟西偏定蒙古色目漢人生員二百人三年各貢二人

武宗至大元年五月御史臺臣言成宗朝建國子監迄今未成請畢其功制可
二年十一月擇衛士子弟充國

子學生 四年閏七月詔興學校上諭省臣曰國子學世祖深所注意如不忽木等皆蒙古人而教以成才朕今親定國子生額為三百人仍增陪堂生二十人通一經以次補伴讀著為式 是年復立國子學試貢法蒙古授官六品色目正七品漢人從七品試蒙古生之法宜從寬色目生宜稍加密漢人生則全用科場之制 仁宗皇慶元年二月徙大都路學所宣周宣王石鼓于國子監命中書平章李孟領國子監學諭之曰學校人材所自出卿宜數詣國學課試諸生勉其德業 二年二月命張珪綱領國子學六月以參知政事許思敬綱領國子學又命監察御史檢監察學官考其殿最旋建崇

文閣于國子監

延祐元年二月命參知政事趙延世

綱領國子學以齊履謙為國子司業 四月立回回國子監 二年八月增置國子生百人陪堂生二十人歲貢伴讀四員用集賢學士趙孟頫禮部尚書元明善等所議國子學貢試之法更定之 一曰陞齋等第六齋東西相向下兩齋左曰游藝右曰依仁凡誦書講說小學屬對者隸焉中兩齋左曰掾德右曰志道講說四書課肄詩律者隸焉上兩齋左曰時習右曰日新講說易詩書春秋科習明經義等程文者隸焉每齋員數不等每季考其所習經書課業及不違規矩者以次遞陞 二曰私試規矩漢人驗日新時習兩齋蒙古色目驗志

道據德兩齋本學實歷坐齋二週歲以上未嘗過犯者許今充試限實歷坐齋三歲以上許充貢舉漢人私試孟月試經疑一道仲月試經義一道季月試策問表章詔誥內科一道辭理俱優爲上等準一分理優詞平者爲中等準半分每歲終通計其年積分至八分以上者陞充高等生員以四十名爲額內蒙古色目各十名漢人二十名歲終試貢員不必備惟取實才有試同闕少者以坐齋月日先後多少爲定 三曰黜罰科條應私試積分生員其有不事課業及一切違戾規矩者初罰一分再犯罰二分三犯除名應已補高等生員其有違戾規矩者初犯殿試一年再犯除名從學正錄糾舉之

正錄知見而不糾舉者亦從本監議罰之應在學生員歲終實歷坐齋不滿半歲者並行除名除月假外其餘告假並不准筭學正錄歲終通行考校應在學生員除蒙古色目別議外其餘漢人生員三年不能通一經及不肯勤學者勒令出學其餘責罰並依舊規

集賢脩撰虞集上學校議略曰師道立則善人多今天下教官猥以資格注授強加之諸生之上而名之曰師有司生徒皆莫之信如此而望師道之立可乎爲今之計莫若使守令自求經明行脩之士身師尊之以求其德化之及庶乎有所觀感也其次則操履近正確守經義師說爲衆所服者又其次則取鄉貢至京師罷歸者

續文獻通考 卷之五十三
其議論文藝猶足以動人非若泛泛莫知根抵者及爲
考官謂同列曰聖經深遠非一人之見可盡不必先有
主意若先有主意則求賢之心狹而差自此始矣同列
服其言故所取多得人焉

英宗初罷回回國子監 至治元年五月命世家子弟成
童者入國學 三年四月命張珪及右司員外郎王士
熙勉勵國子監學

泰定帝三年更積分而爲貢舉並依世祖舊制其貢試之
法從監學所擬大槩與前法略同而防閑少加嚴密焉
其本學正錄各二員司樂一員典籍二員管勾一員及
侍儀舍人舊例舉積分生員充之後以積分旣革以上

齋舉年三十以上學行堪範後學者爲正錄通曉音律
學業優贍者爲司樂幹局通敏者爲典籍管勾其侍儀
舍人於上中齋舉禮儀習熟音吐洪暢曾掌春秋釋奠
每月告朔明贊衆與其能者充之 四年九月勅國子
監仍舊制歲貢生員業成者六人

文宗天曆二年勅增伴讀員數初二十人歲貢二人後於
大德七年定四十人歲貢六人至大四年定四十人歲
貢四人延祐二年歲貢八人爲淹滯旣額設四十名宜
充部令史者四人路教授者四人是後又命所貢生員
每大比選士與天下士同試於禮部策於殿廷又增置
備榜而加選擇焉 十一月命中書左丞趙世延提調

國子監學 至順元年十一月以國子生積分及等者
省臺集賢院奎章閣官同考試中式者以等第試官不
中者復入學肄業 二年六月監察御史韓元善言歷
代國學皆盛獨本朝國學生僅四百員又復分辨蒙古
色目漢人之額請凡蒙古色目漢人不限員數皆得入
學不報

順帝元統二年三月詔科舉取士國子學積分膳學錢糧
儒人免役悉依累朝舊制學校官選有德行學問之人
以充 至元六年十二月國子監積分生員三年一次
依科舉例入會試中者取一十八名時復科舉制故也
後又詔國子生會試不中者同終場下第舉人例授

山長學正 十五年六月中書參知政事實理門言舊
立蒙古國子監專教四怯薛并各愛馬官員子弟今宜
諭之依先例入學俾嚴為訓誨從之

書學 世祖至元九年七月和禮霍孫奏蒙古字已設國
子學而漢官子弟未有學者及官府文移猶有畏吾字
詔自今詔令並以蒙古字行仍遣百官子弟入學 二
十六年尚書省言亦思替非文字宜施于用今翰林院
益福的哈魯丁能通其字乞授以學士凡公卿子弟與
俊民依漢人入學肄習為便遂置回回國子學

文宗至順元年九月詔舉蒙古字學

筭學 世祖至元八年六月令蒙古官子弟好學者兼習

算學

皇明

國初都金陵以元集慶路儒學為國子學 洪武三年設
中都國子學 十四年改建國學于雞鳴山之陽明年
春作先師孔子廟改國子學為監 二十六年革中都
國子監

國朝歲報監生冊即周人學士之版也每歲終總一歲諸
生之數分舉貢官例舊管新收開除實在之目具冊以
獻於 天府蓋人材興替於是驗焉 祖宗時未有入
貲之例而在監者輒將萬人今開例極廣而班生落落
歲終出入不滿千人是不求其故耶

太祖洪武己未遣國子生王文罔等一百三十四人歸省
仍各 賜其父母帛各四疋先是 上諭中書省臣曰
諸生入學之日久矣令歸省其親 賜其父母帛各四
疋有妻孥者携以來月與粟錢務得其歡此勿惜有司
費於是罔等皆告歸有司如 詔賚之 三年 詔設
科取士自是國子生得就京闈鄉試 十七年三月
命禮部頒行科舉成式凡三年大比子午卯酉年鄉試
辰戌丑未年會試祭酒司業擇國子生之性資敦厚文
行可稱者應之 十八年會試國子生多在前列會元
黃子
澄一甲丁顯練
子寧俱監生 上大喜 二十一年三月殿試 上
以監生任亨泰 廷對第一 召祭酒宋訥褒諭之

命撰進士題名記立碑于監門 二十四年三月以監生許觀會試 殿試皆第一 召國子監官褒獎之按皇祖設科舉士既許國子生就試而國子生或得舉者多或在高等則又以為喜豈私於國子哉蓋亦敦崇教始開勵學途其汲汲者如是也二百年來六館青衿仰承休德爭自淬磨每禮闈啓試入對 大廷國子生居天下人士十之六七且輒袞然為舉首焉然後知聖人之神化流洽於無窮也

成祖永樂二年始以北平府學為北京國子監今太學是也里曰崇教坊在都城東北隅即元國學遺址

仁宗洪熙元年北京諸司皆稱行在永樂六年定都于北乃革行在止稱國子監八年重建左廟右學南雍六堂居大堂之後茲則分列于前諸弘規密畫一視東皇祖如之舊

英宗正統九年三月初一日大學士李賢請修建國學孝宗弘治十四年春掌祭酒事禮部右侍郎謝鐸以廟前規度弗稱及諸學舍傾圮題奉 欽依修葺是後節年修理未能歷記

世宗嘉靖十一年祭酒林文俊題修櫺星門前屏牆及內外牆倒塌者時以 大駕將臨廟學盡加煥飾近歲工部題准凡各衙門修理工計百金以上各衙門具 奏行部覆修百金以下移部估修廟學各舍宇墻垣以歲

久多圯近或行工部量修或本監節膳夫銀自修然皆小補缺敝而已其傾沒已甚者尚不無待於奏請也

按四代之學虞商貴在郊夏周貴在國在國以敦禮樂教化之原在郊以遠朝禱市紛之劇 高皇帝卜太學于南都之雞鳴山去朝市且十里今太學雖沿元址其去朝市亦如之不越都闈而夏陽嘗會 列聖所取蓋有深意

北雍規制

成祖初改北平郡學為國子監正堂七間曰彞倫堂中一間入列聖幸學俱設座於此上懸 勅諭五通東一間祭酒公座面南司業座面西堂前為露臺臺南中為甬

路前至太學門長四十三丈 聖駕臨幸由之東西為

屏諸位列班於此後堂三間東講堂三間西講堂三間藥房三間折而東為繩愆廳三間鼓房一間在性堂誠心堂崇志堂各十一間博士廳三間鐘房一間修道堂正義堂廣業堂悉如率性堂六堂乃諸生肄業之所東折而南為廊房九間門一間西亦如之太學門三間門東 勅諭碑一通洪武十五年申明學制一通洪武三年定學規碑一通洪武初年 欽定永樂三年申明學規碑一通洪武十六年并三十年 欽定廟學圖碑一通廟學規制地界四至丈尺盡勒焉正統十二年十一月初四日立外西東并亭一又東為持敬門以入廟自

中少北爲儲門以通啓聖祠土地祠及典簿典籍掌饌
廳倉庫之路祭酒東廂亦由此入西井亭一又西爲退
省號門自西少北爲廣居門以爲司業入廂及諸生入
號之路墀內雜植槐栢共二十一株前爲集賢門三間
門前爲通衢東西牌坊各一題曰國子監盡衢東西牌
坊各一題曰成賢街彝倫堂後齋明所九間格致誠正
號每號計三十七間嘉靖七年作敬一亭 御製 聖
諭共碑七座前爲大門題曰敬一之門祭酒廂房在亭
東司業廂房在亭西會饌堂一所在監東北土地祠五
間在饌堂門之右 典籍廳五間在饌堂門之左 典
簿廳三間 掌饌廳五間退省號及廣居門之西爲天
地人智仁勇文行忠信規矩準繩紀綱法度凡一十八
號并退省房三連混堂淨房各一所

王四夷遣子入學事例

國初高麗遣金濤等四人來入太學 洪武四年濤登進
士授官縣丞不就乃與三人者同遣歸國明年西夏平
其國來賀復請遣子弟來學 上以其涉海之難令與
群下熟議而來 二十一年雲南囉囉土官遣其二子
入監讀書 二十二年西南諸夷建昌烏撒烏蒙芒部
各土官皆遣子入監日本國奏遣其官生來學 二十
五年秋琉球國遣其子及陪臣之子日孜每等至 上
命工部給羅絹爲秋衣給鋪蓋從人亦給衣馬 冬琉

球中山王遣其舅仁悅慈等至是時雲南四川等處土官時遣子弟民生入監者甚衆 給賜亦每與外夷同監前別造房百間居之 永樂二年琉球中山王從子三五良亶等九人以謝 恩至京奏請入監 給賜一如洪武中故事令工部建王子書房於監前以處焉 雲南土官生張文禮等入監者二十八人 四川天全六番招討使高敬謙來朝亦遣其子虎入監是後滇蜀土夷官民生入監多或至六七十人 三年琉球山南王遣寨官子李傑至 四年中山王遣寨官子石達魯等六人至其後李傑石達魯等在監三年得乞歸省 九年中山王遣王相之子懷得寨官子祖魯古至十一年遣寨官子周魯等三人至是年有奏歸省者 上命禮部厚 賜以榮其歸是後乞歸省或令候其使臣還國以行永樂以後至于正德嘗三四遣至焉 嘉靖五年中山王遣官生蔡廷美等四人至十一年歸國 十七年遣梁炫等四人至二十三年歸國隨又遣蔡朝用等五人至令在南雍處以光哲堂歲時給衣物如例 向慕文教琉球於諸夷爲最篤 國家待之亦爲最優 令其授姓命名一如中夏非復初遣之比我 明人文之化於是益可徵矣太學前有交趾號舍蓋 成祖設北監以來所以處交趾官生者乃知當時各夷遣子入學之盛而今文案陳逸不可具考

勲戚入學事例

太學初設大本堂即命功臣子弟徐九恭等入從東
 宮親王講讀尋又令公侯伯初承襲年幼者鄭國公
 常茂靳春侯康鐸等入大本堂讀書洪武五年令年
 幼公侯伯及武官子弟初承襲者皆入國子學肄業是
 時武官子弟自常氏而下蓋二百餘人十六年上
 慮武臣子弟頑梗繩愆廳不能朴罰命曹國公李文
 忠兼領監事以蒞之十八年又諭武臣從朕定天
 下以功世祿其子弟長於富貴又以父兄早歿鮮知問
 學宜令讀書知古今識道理俟有成立然後命官庶
 幾得其實用也昔霍光功非不高身死未久而子孫橫

肆卒致夷滅者不學故也郭子儀中興唐室功蓋天下

位極人臣而心常謙退保全令名而福及後嗣者識道
 理也今武臣子弟但知習武事特患在不學耳永樂
 十六年以永康侯徐安建平伯高福安鄉伯張永年少
 未諳禮度命入監讀書景泰天順以來勲戚如汝
 陽大長公主孫謝琰平江侯陳豫之弟祐南漳郡王子
 周境穀城郡王子魯璣皆乞恩入監寧國大長公主
 曾孫梅俊懷慶大長公主曾孫王隆則由特命焉
 成化十年令公侯伯駙馬初襲授者送監讀書習禮祭
 酒一依學規教之不率者奏聞是歲入監者保定侯梁
 傳等凡十四人上累遣太監黃賜諭祭酒周洪謨嚴

加訓誨毋令惰學十一年命西寧侯宋愷寧晉伯劉福入監又令公侯伯襲爵并駙馬年二十五以下者俱送監讀書崇信伯費淮曠不習讀本監叅題奉旨任俸祿一半革冠帶用衣巾讀書習禮十二年以儀賓王憲禮貌粗率發監讀書十九年大名大長公主魯孫李楨奏乞恩入監弘治三年八月刑科給事中胡金建言儲養將材嚴著程式文事武藝相半講習行移兩京五府各將侯伯都督凡新襲未任事者子孫應該襲蔭者通行送營以習武藝送監以習文事在營月一試驗馬步中箭若干在監即聽祭酒司業月一試驗策略并背誦武經等書各按季類報兵部覆聞上從

之六年春命常寧大長公主孫沐琚入監讀書

九月都察院右副都御史張敷華奏准公侯駙馬伯子孫年十五以上三十以下者送監照依監生讀書作課講習禮儀每歲間月赴監比較文事一次間月又赴教場操練武藝一次其侯伯駙馬亦令將兵家諸書及五倫等書每季送祭酒司業處每日相兼授與二本各定起止令在家誦讀免其作課季終拘驗如初必至三十歲方免拘束雖公爵已襲在閒官亦依此例時邊圉多棘上方注意將材故云嘉靖元年禮部舉故事具題奉旨公侯伯未經事任年三十歲以下都遵照累朝舊典送國子監讀書着祭酒司業用心訓誨試驗

是歲公侯入監者凡八人 六年九月司禮監太監韋
霖傳奉 聖旨朕欲爲駙馬都尉謝詔選儒臣爲師讀
書習禮吏部便會禮部查照 先朝勲戚之家遇有訓
導教書事例於國子監博士助教等或是在部及附近
教官內推選行止端莊年力英銳文學優長義理精明
的一員着在駙馬府教讀經書習字使其知忠孝仁義
之訓及通曉禮樂名物古今事類庶幾德器有成仍聽
禮部堂上官提調稽考教書官三年六年考滿若教有
成效不拘年分奏薦擢用本部會推助教金克厚及議
得本官原係進士出身比之先 朝監生儒士止陞學
錄者不同合無推陞部屬職銜聽堂上官提調專在

馬謝詔府教習奉 旨金克厚陞禮部儀制司主事職
銜專在駙馬都尉謝詔府教習經書仍聽禮部堂上官
提調稽考還照京官一例考滿陞用博士李欽吳監丞
林介俱陞儀制司主事教駙馬讀書 七年春 命舍
山大長公主曾孫尹衡入監讀書 九年禮部題公侯
伯未任事送監者二十二人王田伯蔣榮奏免赴監不
允仍行國子監務要通行稽考毋令怠惰 十五年吏
部奏准公侯駙馬伯家教書訓導按月各將功課照例
赴監考校九年到部行查 時祭酒呂柟奏公侯伯子
孫已未襲爵及未管事官舊規每日在監後偶從寬簡
定以三八日期近年到監止二三人餘多不至蓋此輩

惟耽驕惰不修禮讓一旦管事豈知練撫軍士乞勅
該部轉行各爵戒飭子孫使之敬業樂學永保祿位有
違例又曠者許臣等指名叅劾禮部覆奏行之 十七
年兵科趙士賢題公侯伯禮貌粗疎孺態猶存宜送監
讀書習禮令祭酒擇監生有學識者爲友伴日誦兵書
問試策論以驗進否禮部題准入監如故事 十九年
五月禮部覆國子監司業兼司經局校書王同祖奏陳
四事一曰教世胄臣考之洪武五年令將官子弟承襲
幼者入監讀書成化等年節令公侯伯并駙馬初襲爵
者送監讀書習禮弘治正德間屢經舉行我 皇上龍
興致治崇化其於世胄之教亦旣已行之矣但今世祿
之家間有一二入監習禮者又徃徃虛影故事不守訓
規其於齒胄之道恐莫能知况世臣祿位崇高驕奢易
長使不及其弱冠之年教之詩書禮義以敦其儒素之
風約之規矩準繩以移其傲慢之志則他日委任將見
膏粱紈袴之餘豈勝分闡干城之責鮮有不僨事者臣
請自今公侯伯子弟年十八以上者該部具名上 請
送監讀書習禮本監仍每名選撥友伴監生二名與之
講學相資薰陶規勸每五日一赴監俟諸生立班定友
伴引至階下恭揖而退侍立兩傍以觀揖讓周旋之節
俟堂儀畢赴廂授書講習其有不率教者憑本監堂上
官奏 聞區處三年之後學有成效者本監奏 聞仍

續文獻通考卷之五十五
加表異該部注記俟異時襲封之後有所委任據以甄別賢否則庶乎彬彬向風知所警勸而國之大事亦有賴等因查得嘉靖九年正月內該兵部題准爲申明舊例預養年幼勲戚大臣事內稱公侯伯等爵除已推用及年至三十歲已上外其餘未經任事三十歲以下及應襲舍人年十四以上者通行查出送國子監祭酒司業以大學語孟諸書相兼點授令其講讀又查得禮部堂稿爲申明舊例預養年幼勲戚大臣事儀制司案呈奉本部送准兵部咨該本部題武選司案呈查得成化十一年六月二十二日該太監黃賜傳奉 聖旨西寧侯宋愷寧晉伯劉福送國子監讀書今後公侯伯襲爵

并駙馬年二十五歲以下的都照例送監讀書又弘治二年禮科給事中等官王繪等奏准要將在閒侯伯駙馬分送各營隨同摠兵官操練閒時督令習讀兵書周知邊備方略每月一次總兵官聽其陳說觀其用心以備錄用該本部擬議於五軍營將在閒侯伯駙馬另做一隊聽提督大臣五日一次提督操練將兵家諸書并五倫等書每季送國子監祭酒司業處每日相兼授與兩本定與起止令其在家習讀季終赴監試驗有無通曉大義其侯伯連舍人通筭與駙馬俱至三十歲方不拘束公爵已襲在閒者亦如此例又該兵科等科都給事中楊瑛等于弘治九年奏准要將坐營侯伯擇師而

教該本部議得合無俱令常操時月若彼營歇操團營該走營下操之日俱赴團營一同坐營官閱視畢俱赴將臺聽提督官叩其韜略試其弓馬而回托故不到者亦聽參究以後遇有閱實邊關或整飭邊備文職大臣赴邊者奏差一員同去閱武他日任用大為有益又正德八年該本部議得公侯伯等爵生長膏粱承授祖廕年少既不讀書習禮年長又不操習武藝倘或一旦委用未免束手無策合無本部通行五軍都督府通查帶俸未任公侯伯除年未三十歲相應送監讀書者通行查出開送本部轉送國子監祭酒司業處查照舊例舉行奉 武宗聖旨帶俸公侯伯未及三十的都着送監

讀書每季依擬試驗又嘉靖元年該本部議得公侯伯等爵官員先年各依父祖或翊運靖難之元勳或椒房戚畹之族屬 朝廷推恩許令世襲有賢能者又獲世官崇報之典極為優渥但人生資稟既殊好尚不一况此等世家之孫年幼之時若失於教養成立之後必鮮能繼承雖有 祖宗訓誥武臣之舊章 累朝教育嗣胤之良法類皆廢閣不行難臻實効合將公侯伯等爵未經任事年三十歲以下者通行查出開送本部轉送國子監行祭酒司業將小學四書武經七書 御製武臣大誥臣鑒五倫等書每日相兼點授令其在家講讀照依舊規量加損益每十日一次赴團營聽提督大臣

督令操演每月終令各爵下教讀隨同赴監試驗有無通曉大義如有孝弟忠信禮義廉耻等行超卓實跡及文義弓馬精否年終該營該監回報本部附寫簿籍以憑進呈 御覽兼備參考推用不許推故安閒不行前去本部再行吏部備查各爵下見任教讀姓名履歷賢否先行考校以爲去留如遇名缺務選學問老成行止端莊者授以應得職分責令前去用心訓課并其應襲及子孫弟姪年幼俱聽教誨果有成效照例推用如有因循怠惰及縱令無籍荒淫異術邪佞之徒出入門下誘引非爲貽患各爵身家者該部查訪得實具奏黜退奉 旨公侯伯未經任事三十歲以下的都遵照 聖

朝舊典送國子監讀書着祭酒司業用心教誨試驗還十日一次赴團營聽提督大臣督令操演其餘俱依擬行看得公侯駙馬伯係勲戚重臣兩京提督坐營坐府及在外總兵等官遇有員缺多於公侯伯數內推選守衛將軍亦例用年深老練駙馬管領須教之有素庶幾互相勸勉習與性成用之於內忠孝足任腹心用之於外材略堪充將領若徒有送監送操之虛名而無考校試驗之成法將見良心牴牾於外誘良能昏蔽於驕奢終身不可與入於善矣合候 命下之日申明前例通行五軍都督府各將公侯伯等爵除已推用及年三十以上外其餘未經任事年三十歲以下及應襲舍人年

十四以上者通行查出開送本部轉送國子監行祭酒司業將大學語孟諸書相兼點授令其在家講讀仍授以下學切要功夫以忠信篤敬培養本原心既篤實不偽聰明自然日進毋先之孫吳變詐之術以啟其奸偽好殺之心毋導之詞章浮艷之習以長其紛競爭勝之念至於射御之法軍師行伍之列皆他日之所有事然亦必學而後能每十日一次赴團營聽提督大臣督令操演每月令各爵下教讀隨同赴監試驗年終該監該營備將各爵舍勤惰進否緣由回報本部附寫簿籍以憑參考推用俱至三十歲或有推用而止如有托故不行前去亦聽參究其各爵下教讀人員師道不立訓誨

無效以致各爵交結奸佞誘引爲非一體坐罪參問退黜見缺教讀者轉行吏部查處其駙馬都尉年三十以下者應否亦照前例施行緣係申明舊例預教年幼勳戚大臣事理未敢擅便嘉靖八年十二月二十二日太子太保本部尚書李時等具題奉 旨通行遵照今國子監司業王同祖奏要將公侯伯子弟具名上 請送監讀書習禮及要甄別賢否各一節爲照勳臣之家前代既加褒錫後世子孫得以承襲爵祿或遇任使管理軍務責任匪輕虞廷典樂之職胄子之教所由設也易云蒙以養正書亦曰若生子罔不在厥初生皆言立教之不可不早也况公侯伯應襲子弟出自膏粱素養富

續文獻通考 卷之五十五
二十七
貴易生驕情苟非預教而善養之欲望其能不變於習而成其德也難矣我 國家慎重典禮凡將官子弟年幼者送監讀書自洪武至弘治年間節經舉行 皇上登極益隆治化至嘉靖元等年又因該部建白申明前例題 請凡公侯伯爵等無分已襲未襲已任未任年三十以下十四以上通行查出送監讀書仍每十日赴營觀操照例通行今本官奏要疏名 上請送監備諸勸典無非修明禮教至意相應議處合候 命下本部通行在京五軍都督府及行南京兵部轉行南京五軍都督府將見任公侯伯等爵及應襲子弟年十四以上三十以下未任者通行查出不許隱匿備具年甲籍貫

徑自開送禮部類具姓名上 請分送兩京國子監照依嘉靖八年題准教法分撥習禮肄業本監堂上官躬親督率轉行本堂教官擇老成有德器監生二名與之朝夕講明道義習學典禮不許引誘為非以後照例每年二月查照一次舉行仍候教有成效該監開具行跡送該部照例承襲祖父廕爵已襲未任者開送本部以憑查考推用中間若有不率教者聽本監堂上官及監丞等官照例糾過甚者奏 聞區處 二十年崇信伯費煇等入監者二人 二十八年至三十年恭順侯吳繼爵等次第入監者五人 三十一年入監已襲爵者永康侯徐喬松廣寧伯劉允中未襲爵者定國公之子

徐文壁靖遠伯之子王學詩

勲戚歷年入監習讀姓氏

正統二年駙馬石璟 五年駙馬薩瑄 天順四年西

寧侯宋讓 五年豐潤伯曹振 七年彭城伯張瑾

成化十年保定侯梁博恭順侯吳鑑泰寧侯陳桓鎮遠

侯顧博駙馬都尉王增蔡震楊偉樊凱馬誠游泰靖遠

伯王添崇信伯費淮武進伯朱霖 十一年西寧侯宋

愷寧晉伯劉福 十二年陽武侯薛倫永順伯薛勳宗

人府儀賓王憲 弘治十五年晉寧伯劉岳 十七年

定國公徐光祚鎮遠侯顧仕隆彰武伯楊質東寧伯焦

淇遂安伯陳鏞 正德間文籍無考 嘉靖元年咸寧

侯仇鸞泰寧侯陳儒隆平侯張偉慶陽伯夏臣長寧伯

周大經平江伯陳圭東寧伯焦棟忻城伯趙武 九年

定國公徐延德已襲爵英國公張溶成國公朱希忠昌

國公張宗說未襲爵定西侯蔣傳已襲爵會昌侯孫應

乾西寧侯宋天驄武安侯鄭琨未襲爵駙馬都尉謝詔

寧晉伯劉文玉田伯蔣榮昌化伯邵杰已襲爵成山伯

王維熊宣城伯衛守正懷仁伯施燾彭城伯張勳建平

伯高繼宗遂安伯陳惟忠安仁伯王燧武靖伯趙國斌

南寧伯毛重器應城伯孫忭未襲爵 二十年崇信伯

費煒應城伯孫永爵清平伯吳嘉彥襄城伯李應臣興

安伯徐夢暘 二十八年恭順侯吳繼爵新寧伯譚功

承 二十九年誠意伯劉世延成安伯郭應乾 三十
年武定侯郭守乾 三十一年定國公徐文壁永康侯
徐喬松靖遠伯王學詩廣寧伯劉允中

太學出身事例

二祖篤建二雍紹隆周室 列聖光臨丕贊前徽一代人
賢之盛近古莫並焉太學諸生槩列四途曰貢曰舉曰
廩曰例貢若師達許觀履謙張本周新劉子輔吳寬舉
若夏原吉楊鼎陳誥陳綱姚夔商輅彭時王恕岳正張
寧羅倫陳獻章何景明朱希周蔭若張敷華例若羅理
或以行義或以風節或以功業或以理學皆卓然特出
著名當世不特掇巍科躋膺仕徧于中外已也

國初太學生皆貢自郡邑選鄉學之秀彥者充之其後乃
有各省鄉試舉人時進士之科未盛內而臺諫外而藩
臬率以授諸太學生之成材者自制科既重太學生成
材者與天下賢士盡入蒐羅於是內外要重之司皆歸
進士而舉貢所稱監生者則有遺賢銓人高等不過授
以省府幕僚郡佐州正而臺諫藩臬則必待其歷官有
譽而後得之然亦千百而什一耳往年江陵張相當國
嘗力主三途並用之議僅一行焉而輒不能繼豈太學
之美能盡錄於甲科耶

成武二年擇國子生試用之巡行列郡舉其職者竣
事復 命即擢行省左右叅政各道按察司僉事及知

府等官 五年夏四月以國子生王鐸攝監察御史初
上命祭酒司業選鐸等侍講 王宮至是試用之鐸
能其官擢浙江布政司左叅政六年九月纂修日曆選
善書者膳黨國子生陳益暘等與焉 是年暫罷科舉
令有司察舉賢才必以德行為本文藝次之仍令吏部
選國子生之成材者與所舉俱叅用量材授主事給事
中御史等官 七年擇博士趙淑等所教國子生年少
聰明者李擴等八文華武英二堂說書謂之小秀才甚
見寵遇明年以擴等為監察御史 上以擴及郎敏等
在二堂學業日進宜職清要故擢用之 九年三月以
武英堂紀事國子生黃義為湖廣行省叅政趙信為考

功監丞 十九年五月 上以天下郡縣多吏弊民苦

皆由雜流得為牧民官乃 命祭酒司業擇監生千餘

人送吏部除授知州知縣等職 二十年十二月擢監

生李慶署都察院右僉都御史 二十四年選監生練

達政 暄者得方文等六百三十九人 命行御史事稽

覈天下百司案牘 二十五年擢監生師達墨麟等為

監察御史夏原吉為戶部主事 二十九年擢監生盧

祥為刑部郎中 三十五年 成祖即位三月擢監生

丁琰姚山李晟九月擢王孚陳禮朱肇何海陸禎王政

姚燭阮琮姚伯善俱為給事中

成祖末樂元年二月擢監生孔復楊鈍張文明李時秀蔣

彙編通考卷之五十五
三十一
沈實
彥祿歐彥貴何器劉先爲監察御史四月擢監生余得
祥梁觀潘熙和爲給事中張政原汪俊民趙能爲監察
御史五月 太祖高皇帝實錄成 賜騰寫監生梁逢
吉等各銀十兩鈔三十錠六月擢騰寫監生鍾子勤陳
彛訓劉謙沈文爲中書舍人梁逢吉葉蕃沈紹先葉松
喬岳衛浩鄭中余從善陳俊良陳實爲監察御史七月
以監生汪必先鍾震劉觀就林金英張翥陳英楊泰劉
寔王文爲監察御史十月擢監生張恂十二月擢監生
郭宣畢進華楨王生沈旻張麟熊觀薛魯俱爲給事中
二年二月擢監生李矩周正秦瓚魏清文振許信閔
和呂衡楊祥楊儼任重王理陸必壽王良爲監察御史

四月擢監生楊銘游顏爲給事中 四年二月擢監生
彭進徐鑑方霖林道顧斌竇承芳朱福王輔彭鑑劉煥
黃員相七月擢監生宋仲祥周轅徐竒艾良俱爲監察
御史十月擢監生蔡誠彭昭尹醇鍾恕爲給事中 五
年九月擢監生李琳爲山東道監察御史 六年三月
擢監生田謙張冀四月擢監生孫儼王增朱應祖孫暘
俱爲監察御史擢監生党忠爲吏科給事中宋載爲戶
科給事中胡渙王成美爲禮科給事中周鎬蕭鼎李頻
爲兵科給事中劉誠任憲爲刑科給事中劉泉胡進張
用中白永爲工科給事中 七年二月擢監生署六科
給事中汪藻吏科李節戶科劉伯蘊禮科金文英兵科

萬質刑科史壽工科擢監生劉子輔張觀鄭璘劉保陳
耘張濬王璠張善王渥朱侃劉洵潘浩陳禮李本俱爲
監察御史 八年署六科汪藻等俱實授擢監生許堪
蹇賢周珙金文斌駱大良許琪賈旭劉可范寧鄭季輝
蕭良張意汪泳劉政孫昇爲監察御史郭良周順沈和
傅璇吳正陳鐸楊彝周岐陳諤周汝賢爲給事中 九
年擢監生陳模李復鄭進善張添祿王杲商賢訥寧劉
廣胡良誠于敏林勝宗白璧宋友謙爲監察御史 是
年春進士鍾英張習張式馬信邵聰改翰林院庶吉士
初五人者由監生選入翰林習譯書至是登科故有此
改後以爲例十年十六人十三年三十二人 十年三

月擢監生程致爲中書舍人隸翰林院書 制初擢監

生張勤龍景亨趙文施悅濮恭任旺祝和陳恕郭端賈
節趙益廖睿周毅李善楊俊張斌吳文吳克聰顧立鄒
烜李弘蕭原祝昇苗貫謝庸熊傑童貞吳銘張達雷恭
解昌党衢周尚賓俱爲監察御史十二月擢監生梁通
爲河南按察使張岳趙彬爲副使章錄李清爲僉事二
月擢監生李華盧榮趙真趙旭卜楨楊益馮得爲給事
中黃文惠王維新韓真李遜申嶽張肅封貴朱哲爲監
察御史錢博葉秦姚秩金勉焦莊陳謨洪益中倪琮劉
維新王賓爲中書舍人冬十月擢監生王卣蘇弼楊和
李謙張志葛紹祖王憲許侃岳順梁盛張毅朱昭紀文

崔尙李濬王勵劉伸許能屈良張貫朱威陸德厚張縉
邵寔張守信苗友直李應庚張翔馬駿牛麟田綱為六
科給事中

宣宗宣德四年五月擢監生韓偉張玉為監察御史

英宗正統二年以 宣廟實錄成騰錄監生俱授中書舍
人

憲宗成化二年八月擢監生羅麟孫迥為中書舍人侍

崇王讀書習字 三年五月擢監生呂憲為中書舍人

憲故學士原之子以廕補也是後官生 命於中書舍

人習字出身以為常 八月 命監生高峴入翰林習

字出身峴故工部尚書謹身殿大學士兼東閣大學士

穀之子也 十九年九月授吏部聽選舉人監生陳獻

章為翰林檢討而聽其回 命進士王圻為

自正統以來舉貢監生無復有徑授臺諫及藩臬長貳

者嘉靖八年 廷議復申三途並用之例於是舉人

監生孫翥為給事中舉人監生阮徽歲貢監生張澍為

監察御史

自五祿以來舉貢盡半無與育對對臺廟又蕃臬長有
章為縛林劍情而鄭其回

十六年六月對吏暗鄭舉入溫主刺熾

續文獻通考卷之五十六

皇明進士雲間王圻纂輯

學校考 祠祭上

宋度宗咸淳三年帝釋菜於孔子以顏淵曾參孔伋孟軻
配列邵雍司馬光從祀又陞顓孫師於十哲追封雍新
安伯講官監官三學長貳及諸生推恩有差

遼太祖神冊元年春立子倍為皇太子問侍臣曰受命之
君當事天敬神有大功德者朕欲祀之何先皆以佛對
太祖曰佛非中國教皇太子對曰孔子大聖萬世所尊
祀宜先太祖大悅即建孔子廟詔皇太子春秋釋奠
四年八月謁孔子廟

史稱遼之義宗可謂盛矣其始慕秦伯之賢而為讓國之謀終疾陳恒之惡而為請討之舉李從珂弒王倍遼請討之志趣之卓蓋已見於早歲先祀孔子之言終遼之世賢聖繼統皆其子孫至德之報昭然矣

道宗清寧六年六月命以時祭先聖先師

金

熙宗天會十五年立孔子廟于上京天眷三年詔求孔子後加四十九代孫璠承奉郎襲封衍聖公奉祀事

皇統元年二月親祭孔子廟北面再拜退謂侍臣曰朕幼年游佚不知志學歲月逾邁深以為悔孔子雖無位其道可尊使萬世景仰大凡為善不可不勉自是頗讀

尚書論語及五代遼史諸書或以夜繼焉三年衍聖

公孔璠薨以其子拯襲封加文林郎

海陵天德二年二月初定襲封衍聖公俸格有加于常品又加拯承直郎

世宗大定元年以顏歆從祀廟廷十四年國子監言歲春秋仲月上丁日釋奠于文宣王用本監官房錢六十貫止造茶食等物以大小楪排設用留守司樂以樂工為禮生率倉場等官陪禮于古禮未合也伏覩國家承平日久典章文物當燦然具備以光萬世况京師為首善之地四方之所觀仰據釋奠器物行禮次序合行下詳定夫交國公親承教者也鄒國公功扶聖教者也當

于先聖像左右列之今孟子以燕服在後堂宣聖像側
還虛一位禮宜遷孟子像于宣聖右與顏子相對改塑
冠冕粧飾法服一遵舊制禮官乃參酌唐開元禮定擬
釋奠儀數文宣王克國公鄒國公每位籩豆各十犧尊
一象尊一簠簋各二俎二祝版各一皆設案七十二賢
二十一先儒每位各籩二豆一爵一兩廡各設象尊二
總用籩豆各一百二十三簠簋各六俎六犧尊三象尊
七爵九十四其樽皆有玷壘二洗二篚勺各二罍六正
位并從祀籍尊壘俎豆席約用三十幅尊席用葦俎豆
席用莞牲用羊豕各三酒二十瓶禮行三獻以祭酒司
業博士充分奠官二讀祝官一太常令一捧祝官二壘

洗官一爵洗官一巾篚官二禮直官十一學生以儒服
陪位樂用登歌大樂令一員本署官充樂工三十九人
十六年詔立兗州學闕里廟宅子孫年十三以上入
學者不限數二十年十二月特授襲封衍聖公孔摠
兗州曲阜令封爵如故時召摠至京師欲與之官尚
書省奏摠主先聖祀若加任使守奉有缺上曰然乃授
曲阜縣令二十三年二月以尚書右丞張汝弼攝太
尉致祭于至聖文宣王廟

章宗明昌元年三月詔修曲阜孔子廟學三年四月詔
曰衍聖公秩視四品階正八品不稱可超遷中議大夫
未著于令八月定先聖廟春秋釋奠三獻官以祭酒司

業博士充祝詞稱皇帝謹遣及登歌改用太常樂工其
獻官并執事與享者並法服陪位學官公服學生儒服
盖用大定時禮官所議也 十月有司奏增修曲阜宣
聖廟勅党懷英撰碑文朕將親行釋奠之禮其檢討故
事以聞十一月賜党懷英所薦孔子四十八代孫端甫
同進士出身 四年八月釋奠孔子廟北面再拜親王
百官大學生陪位 六年四月勅有司以增修曲阜宣
聖廟工畢賜衍聖公以下三獻法服及登歌樂一部仍
遣太常舊工往教孔氏子弟以脩祭禮 七月命兗州
長官以曲阜新修廟告成于先聖 承安二年二月特
命襲封衍聖公孔元措世襲兼曲阜令 時春丁章宗

親視以親王攝亞終獻皇族陪祀文武群臣助奠上親
為贊文舊封公者陞為國公侯者為國侯郊伯以下皆
封侯 四年二月詔刺史州郡無宣聖廟學者並增修
之 五年三月諭有司進士名有犯孔子諱者避之仍
著為令

宣宗貞祐三年十月召中奉大夫襲封衍聖公孔元措為
太常博士上念元措聖人之後山東盜賊縱橫恐罹其
害是使之奉祀而反傷之也故召入朝 元措歷事宣宗
哀宗後歸于元
遷汴後建廟會朝門內歲祀如儀宣聖顏孟各羊一豕
一餘同小祀共用羊八無豕其諸州釋奠並遵唐儀
哀宗天興元年八月釋奠孔子

元

太祖初平燕京以金樞密院為宣聖廟

內翰王文康公鶚元初自保定應聘北行時故人馬雲漢以宣聖畫像為贈既達北庭值秋公奏行釋奠禮世祖悅即命舉其事公為祝文行三獻禮禮畢進胙于上上飲福熟其胙命左右均霑所賜自是春秋二仲歲以為常蓋元之所以尊師重道者實公有以啟之

太宗五年勅修孔子廟 八年復修孔子廟

世祖中統二年詔宣聖廟有司歲時致祭月朔釋奠禁官員使臣軍馬毋得侵擾褻瀆違者加罪八月丁酉命開平守臣釋奠於宣聖廟 三年正月修宣聖廟成 至

元四年勅修曲阜宣聖廟 五月初上都重建孔子廟

曲阜孔子廟歷代給民百戶以供洒掃復其家至是尚書省以括戶之故盡收為民翰林學士王磐言林廟戶百家歲賦鈔不過六百貫僅比一六品官終年俸耳聖朝疆域萬里財賦歲億萬計豈愛一六品官俸不以待孔子哉且于帑庫所省無多其損國體甚大時論避之十三年以孔子五十三世孫曲阜縣尹孔治兼權主祀事 十九年以宋衍聖公孔洙為國子祭酒兼提舉

浙東學校

按孔子後自宋南渡初其四十八代孫端友子玠寓衢州元既平宋擬所立或言孔氏子孫寓衢者乃其宗子

經文獻通考卷之五十六
五
召洙赴闕洙遜於居曲阜者帝曰寧違榮而不違親真
聖人後也故有是命

成宗元貞元年詔中外崇奉孔子

瓊山丘氏曰按寧獻王所著通鑑博論於至元十八年
有云帝信桑門之惑盡焚中國道藏闢儒道二教爲外
學貶孔子爲中賢尊桑門爲正道又爲世祖斷云聽妖
僧祥逼之誘作妖書以毀昊天上帝貶孔子爲邪道擬
爲中賢不足稱聖及考元史止於是年焚毀道書而不
見所謂貶孔子之實惟成宗本紀世祖正月崩成宗卽
位是年秋七月卽詔中外崇奉孔子夫孔子自唐宋以
來天下學校通祀之已非一日又何待今日始詔中外

崇奉之哉噫當時必有所施行如博論所云者元史臣
爲世祖諱故略去之嗚呼孔子既沒之後世主未嘗敢
有異論者使誠有是事則世祖之罪浮於始皇矣疑以
傳疑史家通例也故因所疑而書之以俟知者

大德六年六月建文宣王廟於京師先是京師未有孔
子廟而國學寓於他署至是左丞相哈剌哈孫乃奏始
建之 七年給大都文宣王廟洒掃戶五 九年給曲
阜林廟洒掃戶以尚珍署田五十頃供歲祀

閻子靜復曲阜廟碑略曰聖上嗣服之初祗述祖考之
成訓興學養士嚴祀宣聖自曲阜始明年元貞改元先
聖五十三代孫密州尹治入朝壘書賜命中議大夫襲

續文獻通考卷之五十六
封衍聖公月俸有千秩視四品孔氏世爵弗傳者久至
是乃復申命有司制考辟雍作廟於京師由是四方嚮
風崇建廟學惟恐居後闕里祠宇燬於金季之亂閣號
奎文若大中門闕存者無幾右轄嚴公忠濟保魯嘗假
清臺頒曆錢佐營繕之費歲戊申始復鄆國後寢以寓
先聖顏孟十哲像至元丁卯衍聖公治尹曲阜王祀事
將圖起廢奎文杏壇齋廳黌舍卽其舊而新之禮殿則
未遑也國初封建宗室畫濟交單三州爲魯國大長公
王駙馬濟寧王分地置濟寧總管府屬縣十六曲阜其
一也濟寧守臣按擅不華恭承詔旨會府尹僚佐鄉長
者謀以廟役爲任首出錢幣萬緡衆翕然助之傭工僱
力市木於河壘石於山掄材於野采棟橧桷楹礎之屬
悉具又得泗水渠堰積石數百石聖稱是露階銘砌咸
足用焉郡政之暇躬爲督視甄陶鍛冶丹雘髹漆以至
工師廩積各有司存經始於大德二年之春屬歲侵中
止續事於五年之秋不期月而告成殿轟重簷亢以層
基繚以修廊大成有門七十二賢有廡泗沂二公有位
黼座旣遷更塑鄆國像於後寢締構堅貞規模壯麗大
小以楹計者百二十有六費用以緡計者十萬有奇落
成之日遠近助祭者衣冠輻輳衆庶瞻顙千輿祖庭頓
還舊觀於是衍聖公治遺其子曲阜令思誠奉表以聞
且以廟碑爲請會選胄子入學擢思誠國子監丞特勅

續文獻通考卷之五十一
中書賜田五千畝以供粢盛戶二十八以應酒掃仍下翰林書其事於石臣復承命踧踖既述興造始末竊惟聖元神武造邦天兵傳汴戎事方殷不忘先聖之祀詔令五十一代孫衍聖公元措歸魯哀集奉常禮樂於兵燼之餘燕翼之謀肇於此矣世祖聖德神功文武皇帝仁沾義洽九域混同文物煥然可觀內立國學外置郡邑學官而於先聖之後尤所注意遴選師儒訓迪作成需賢以嗣封爵茲志未究皇上繼而行之用能培植教本光昭先業以致魯國臣民思樂泮水如附靈臺子來之衆至矣哉觀文化下必世後仁之效豈特震耀一時實宗社無疆之福也

十年大都宣聖廟成行釋奠禮牲用太牢樂用登歌
十一年七月制加孔子號曰大成制曰先孔子而聖者非孔子無以明後孔子而聖者非孔子無以法所謂祖述堯舜憲章文武儀範百王師表萬世者也可加大成至聖文宣王遣使闕里祀以太牢嗚呼父子之親君臣之義未惟聖教之尊天地之大日月之明奚聲名言之妙尚資神化祚我皇元

武宗至大二年定釋奠禮祭用二丁牲用太牢 四年遣使祀曲阜命國子祭酒劉賡以太牢致祀

仁宗即位遣宦者李邦寧釋奠於孔子邦寧既受命行禮方就位忽大風起殿上及兩廡燭盡滅燭臺底鐵罇入

續文獻通考 卷之五十一
地尺許不可拔邦寧悚息伏地諸執事者皆伏良久風
息乃成禮邦寧因慙悔累日

胡粹中曰祭祀所以交神明故將有事焉必先射以觀
德及期則齋以告虔戒以告潔刑罪喪疾之人不敢以
與執役况敢主其祭乎邦寧闕腐餘醜其爲刑疾孰甚
焉而使之釋奠曾謂仲尼不如林放乎神不享非禮大
風之變吾先聖豈可誣哉仁宗胡主宜不知此李孟以
平章兼領國學而致其以非禮事先聖罪蓋不容揜矣
皇慶二年六月以宋儒周敦頤程顥程頤張載邵雍司
馬光朱熹張栻呂祖謙及故中書左丞許衡從祀孔子
廟庭

瓊山丘氏曰自唐以諸儒從祀孔子廟庭後世因之必
其人於孔子之道有發明衛翼之功然後與焉非徒崇
德亦以報功也夫孔子有大功於天地以其刪述六經
也世之儒者必於是六經躬而行之闡而明之然後得
以與於從祀之列苟棄其書而不用背其道而逆施陪
食聖人廟庭之間其心安乎春秋一經關係尤大宋王
安石棄春秋之經者也一時群小附和雖躋之於從祀
之列其後公論卒定禡而去之元之許衡則悖春秋之
經者也春秋之道內夏外夷一會之頃尚不容其主中
國况四海之大其肯容之爲君乎或曰仕元之人多矣
乃獨責衡可乎曰此朱子責脩楊雄之意也他人隨世

就功者何責焉或曰宋室南遷女直據有中國韃靼奄而有之三綱淪而九法斁矣賴許子以河洛正傳起而輔之中國不純變于戎夷人類不盡入於禽獸未必非許子功也則許子豈可輕訾乎哉曰爲一世計則許子固不爲無功矣爲萬世計則許子豈得無罪哉嘗即元史考之妻無偏正皆稱后子無嫡庶皆稱太子父死而子烝其妾兄喪而弟妻其嫂倫理皆蕩然矣八思巴以夷狄之黠大朝會坐於正殿之上與其君同受群臣朝賀又造爲字書以亂吾中國自結繩以後之文焉其教法蓋蔑然矣官之正員必有胡類國有大議遂出漢臣使不得與聞其政事是三者治天下之大經大法也許

子曾一言及之乎言則史必書之矣此其大者不能謹之則其功效之小者何補哉中國所以不純變於夷狄人類所以不盡入於禽獸是蓋天理在人心者不容終泯中國先王之澤猶存乎人耳豈盡許子功耶或曰今許子從祀孔子廟庭幾二百年矣名公鉅儒生其後者曾無一人一言非之子獨何據而云然予曰此蓋元人自祀其臣而其門人自尊其師亦如宋人以王安石配享夫子耳故 我朝沿之未革焉夫衆言淆亂折諸聖予蓋折諸孔子春秋者也夫豈無稽之言哉

延祐三年詔春秋釋奠於先聖以顏子曾子子思孟子配享加封顏子交國復聖公曾子邾國宗聖公子思沂

國述聖公孟子鄒國亞聖公 六月制封孟軻父爲邾國公母爲邾國宣獻夫人

許約曰自唐祀夫子配以顏子至宋陞孟子與顏子並配然當時未知道統之傳也自伊洛之學興性理之說明始以顏曾思孟並列于夫子之左蓋得夫子之傳者顏曾子思也得曾思之傳者孟子也故江南諸路學廟皆以四子並配以子張居七十二子之首自兩廡升於十哲補曾子之闕此當因而不當革者也今京師學廟與河北諸路府學並循亡金之舊左顏右孟與夫子並居南面有是理哉孟子學于子思子思學于曾子是知了孟子乃曾子門人之弟子曾子乃孟子師之師也今屈

曾子於從祀之中降子思於廊廡之末師之師不過一籩一豆門人弟子牲牢幣帛一與先聖等又豈有是理哉况今天下一家豈容南北之禮各異或謂學校所以明人倫路點皆父也回參皆子也子先父食于理安乎竊以爲不然廟學乃國家通祀猶朝廷之禮也父爲庶僚子爲宰職各以其德與勲也如遇朝會殿廷班列則父雖尊安能超於子之上哉蓋抑私親而昭公道尊道統以崇正學乃所以明人倫也如今序傳道之配使顏曾思孟並列於夫子之左虛其右隅以避古者神位之方自兩廡升子張於十哲以補曾子之闕不惟先儒師弟之禮不廢使南北無二制天下無異禮亦可以見

我朝明道統得禮之中足以垂世無窮矣

延祐六年追封宋儒周敦頤為道國公 是年封遠瑗

為內黃侯從祀孔子 時上問孔子之後今幾世襲爵

為誰廷臣具對曰未定帝親取孔氏譜謀按之曰以嫡

應襲封者思晦也復奚疑時授中議大夫襲封衍聖公

月俸百緡加至五百緡賜四品印

英宗至治二年春正月勅有司卹孔氏子孫貧乏者

泰定帝泰定元年遣使詣曲阜以太牢祀孔子 三年山

東廉訪副使王鵬南言孔思晦襲爵上公而階止四品

于格弗稱且失尊崇意明年遂進階嘉議大夫 文宗天曆二年遣使祀曲阜以翰林侍講學士曹元用往

祠 至順元年孔思晦以聖父舊封齊國公封爵未崇

因言于朝曰宣聖封王而父爵猶公願加褒崇乃加封

孔子父齊國公叔梁紇為啟聖王母魯國太夫人顏為

啟聖王夫人孔子父母有封爵自此始時四配皆加贈又河南伯程

顥加豫國公伊陽伯程頤加洛國公 十月降靈書申

飭衍聖公崇奉孔子廟事十一月以董仲舒從祀孔子

廟位列七十子之下 二年正月勅建孔子廟于後衛

七月藝文少監歐陽玄言先聖五十四代孫襲封衍聖

公爵最五等秩登二品而用四品銅印於爵秩不稱詔

鑄從三品印給之 八月立閔子書院於濟南 賜上

都孔子廟碑 三年正月封孔子妻鄆國夫人卹官氏

為大成至聖文宣王夫人 追封孟子父為聊國公母
為聊國宣獻夫人 二月詔修曲阜宣聖廟 先是开
官夫人神座生木芍藥一本見者異之而修廟令下
五月追封顏子父顏無繇為杞國公謚文裕母齊姜氏
杞國夫人謚端獻妻戴氏交國夫人謚貞素

順帝元統元年命浙江行省範銅造和寧宣聖廟祭器凡
百三十有五事 至元元年四月遣使者詣曲阜孔子
廟致祭 四年七月詔修曲阜孔子廟 六年以孔克
堅襲封衍聖公 至正二年十二月詔遣官致祭孔子
於曲阜 八年七月遣使祀曲阜孔子廟 十五年十
月以襲封衍聖公孔克堅同知太常禮儀院事以克堅

子希學襲封衍聖公 十六年命集賢直學士楊俊民
致祭孔子曲阜廟仍葺其廟宇 十九年江浙行省請
楊時李侗胡安國蔡沉真德秀五人從祀 二十二年
禮部定擬五先生封爵謚號俱贈太師楊時追封吳國
公李侗追封越國公胡安國追封楚國公蔡沉追封建
國公真德秀追封福國公各給祠額宣命遣官賫往福
建行省訪問各人子孫給付如無子孫者於其故所居
鄉里郡縣學或書院祠堂內安置施行 是年追謚朱
熹父松為獻靖改封熹為齊國公

祠祭先聖禮儀

元祝幣之式 祝版三各一尺二寸廣八寸木用楸梓栢

文曰維年月日皇帝敬遣某官等致祭于大成至聖文
宣王先師曰維年月日某官等致祭於某國公幣三用
絹各長一丈八尺

牲齊器皿之數 牲用牛一羊五豕五以犧尊實之齊象
尊實醴齊皆三有上尊加冕有杓設堂上太尊實泚齊
山壘實醴齊有上尊著尊實盞齊犧尊實醴齊象尊實
沈齊壺尊實三酒皆有上尊設堂下盥洗位在阼階之
東以象尊實醴齊有上尊加冕有勺設於兩廡近北盥
洗位在階下近南籩十豆十簋二簋二登三鉶三俎三
有毛血豆正配位同籩豆皆二簋一簋一俎一從祀皆
同凡銅之器六百八十有一宣和爵玷一豆二百四十

有八簋簋各一百一十有五登六犧尊象尊各六山尊
二壺尊六著尊太尊各二壘二洗二鬲勺二十有七玷
二十有八爵一百一十有八竹木之器三百八十有四
籩二百四十有八篚三俎百三十有三陶器三瓶二香
爐一籩巾二百四十有八簋簋巾二百四十有八俎巾
百三十有三黃巾蒙單十其樂用登歌其日用春秋二
仲月上丁有故改用仲丁

省牲 前期一日晡時三獻官監祭官各具公服詣省牲
所阼階東西向立以北爲上少頃引贊者引三獻官監
祭官巡牲一匝北向立以西爲上待禮牲者折身曰充
贊者曰告充畢禮牲者又折身曰膾贊者曰告膾畢贊

者復引三獻官監祭官詣神厨視滌漑畢還齋所釋服
釋奠 是日丑前五刺初獻官及兩廡分奠官二員各具
公服於幕次諸執事者具儒服先於神門外西序東向
立以北爲上明贊承傳贊先詣殿庭前再拜畢明贊升
露階東南隅西向立承傳立於神門階東南隅西向立
掌儀先引諸執事者各司其事引贊者引初獻官兩廡
分奠官點視陳設引贊者進前曰請點視陳設至階曰
升階至殿簷下曰詣大成至聖文宣王神位前至位曰
北向立點視畢曰詣兗國公神位前至位曰東向立點
視畢曰詣鄒國公神位前至位曰西向立點視畢曰詣
東從祀神位前至位曰東向立點視畢曰詣西從祀神
位前至位曰西向立點視畢曰詣酒尊所曰西向立點
視畢曰詣三獻爵洗位至階曰降階至位曰北向立點
視畢曰詣三獻官盥洗位至位曰北向立點視畢曰請
就次方初獻點視時明贊二人各引東西廡分奠官曰
請詣東西廡神位前東曰東向西向立點視畢曰先儒神位
前至位曰南向立點視畢曰退詣酒尊所至酒尊所東
西向立點視畢曰退詣分奠官爵洗位至位曰南向立
點視畢曰請就次兩廡分奠官點視畢引贊曰請詣望
瘞位至位曰北向立點視畢曰請就次

初獻官釋公服司鐘者擊鐘初獻已下各服其服齊班於
幕次掌儀點視班齊詣明贊報知引禮者引監祭官監

禮官就位進前曰請就位至位曰就位西向立明贊唱
曰典樂官以樂工進就位承傳贊曰典樂官以樂工進
就位明贊唱曰諸執事者就位承傳贊曰諸生就位引
班者引諸生就位明贊唱曰陪位官就位承傳贊曰陪
位官就位引班者引陪位官就位明贊唱曰獻官就位
承傳贊曰獻官就位引贊者進前曰請就位至位曰西
向立明贊唱曰闕戶俟戶闕迎神之曲九奏樂止明贊
唱曰初獻官以下皆再拜承傳贊曰鞠躬拜興拜興平
身明贊唱曰諸執事者各司其事俟執事者立定明贊
唱曰初獻官奠幣引贊者進前曰請詣盥洗位盥洗之
樂作至位曰北向立搯笏盥手帨手出笏樂止及階曰

升階升殿之樂作樂止入門曰詣大成至聖文宣王神
位前至位曰就位北向立稍前奠幣之樂作搯笏跪三
上香奉幣者以幣授初獻初獻授幣奠訖出笏就拜興
平身少退再拜鞠躬拜興拜興平身曰詣兗國公神位
前至位曰就位東向立奠幣如上儀曰詣鄒國公神位
前至位曰就位西向立奠幣如上儀樂止曰退復位及
階降殿之樂作樂止至位曰就位西向立俟立定明贊
唱曰禮饌官進俎奉俎之樂作乃進俎樂止進俎畢明
贊唱曰初獻官行禮引贊者進前曰請詣盥洗位盥洗
之樂作至位曰北向立搯笏盥手帨手出笏請詣爵洗
位至位曰北向立搯笏執爵滌爵拭爵以爵授執事者

如是者三出笏樂止曰請詣酒尊所及階升殿之樂作
曰升階樂止至酒尊所曰西向立搢笏執爵舉冪司尊
者酌犧尊之泛齊以爵授執事者如是者三出笏曰詣
大成至聖文宣王神位前至位曰就位北向立酌獻之
樂作稍前搢笏跪三上香執爵三祭酒奠爵出笏樂止
祝人東向跪讀祝祝在獻官之左讀畢興先詣左配位
南向立引贊曰就拜興平身少退再拜鞠躬拜興拜興
平身曰詣兗國公神位前至位曰就位東向立酌獻之
樂作樂止讀祝如上儀曰詣鄒國公神位前至位曰就
位西向立酌獻之樂作樂止讀祝如上儀曰退復位至
階降殿之樂作樂止至位曰就位西向立俟立定明贊

唱曰亞獻官行禮引贊者進前曰請詣盥洗位至位曰
北向立搢笏盥手悅手出笏請詣爵洗位至位曰北向立搢
笏執爵滌爵拭爵以爵授執事者如是者三出笏請詣
酒尊所曰西向立搢笏執爵舉冪司尊者酌象尊之醴
齊以爵授執事者如是者三出笏曰詣大成至聖文宣
王神位前至位曰就拜北向立酌獻之樂作稍前搢笏
跪三上香執爵三祭酒奠爵出笏就拜興平身少退鞠
躬拜興拜興平身曰詣兗國公神位前至位曰東向立
酌獻如上儀曰詣鄒國公神位前至位曰西向立酌獻
如上儀樂止曰退復位及階曰降階至位曰就位西向
立明贊唱曰終獻官行禮引贊者進前曰請詣盥洗位

至位曰北向立搢笏盥手悅手出笏請詣爵洗位至位
曰北向立搢笏執爵滌爵拭爵以爵授執事者如是者
三出笏請詣酒尊所至階曰升階至酒尊所曰西向立
搢笏執爵舉鬯司尊者酌象尊之醴齊以爵授執事者
如是者三出笏曰詣大成至聖文宣王神位前至位曰
就位北向立稍前酌獻之樂作搢笏跪三上香執爵三
祭酒奠爵出笏就拜興平身少退鞠躬拜興拜興平身
曰詣交國公神位前至位曰東向立酌獻如上儀曰詣
鄒國公神位前至位曰西向立酌獻如上儀樂止曰退
復位及階曰降階至位曰就位西向立明贊唱曰分獻
官行禮引贊者分引東西從祀分獻官進前曰詣盥洗
位至位曰北向立搢笏盥手悅手出笏詣爵洗位至位
曰北向立搢笏執爵滌爵拭爵以爵授執事者出笏詣
酒尊所至階曰升階至酒尊所曰西向立搢笏執爵舉
鬯司尊者酌象尊之醴齊以爵授執事者出笏詣東從
祀神位前至位曰就位東向立稍前搢笏跪三上香執
爵三祭酒奠爵出笏就拜興平身少退鞠躬拜興拜興
平身退復位及階曰降階至位曰就位西向立引西從
祀分獻官同上儀唯至神位前東向立作西向立明贊
唱曰兩廡分奠官行禮引贊者進前曰詣盥洗位至位
曰南向立搢笏盥手悅手出笏詣爵洗位至位曰南向
立搢笏執爵滌爵拭爵以爵授執事者出笏曰詣東廡

酒尊所及階曰升階至酒尊所曰北向立搢笏執爵舉
冪酌象尊之醴齊以爵授執事者出笏詣東廡神位前
至位曰東向立稍前搢笏跪三上香執爵三祭酒奠爵
出笏就拜興平身稍退鞠躬拜興拜興身退復位至
階曰降階至位曰就位西向立引西廡分奠官同上儀
唯至神位前東向立作西向立俟終獻十哲兩廡分奠
官同時復位明贊唱曰禮饌徹籩豆徹饌之樂作禮饌
者跪移先聖前籩豆略離席樂止明贊唱曰諸執事者
退復位俟諸執事者至板位立定送神之樂作明贊唱
曰初獻官以下皆再拜承傳贊曰鞠躬拜興拜興平身
樂止明贊唱曰祝人取祝幣人取幣詣瘞次俟徹祝幣

者出殿門北向立望瘞之樂作明贊唱曰三獻官詣望
瘞位引贊者進前曰請詣望瘞位至位曰就位北向立
曰可瘞埋畢曰退復位至殿庭前候樂止明贊唱曰典
樂官以樂工出就位明贊唱曰闔戶又唱曰初獻官以
下退詣圓揖位引贊者引獻官退詣圓揖位至位初獻
在西亞終獻及分獻已下在東陪位官東班在東西班
在西俟立定明贊唱曰圓揖禮畢退復位引贊者各引
獻官詣幕次更衣其飲福受胙除國學外諸處仍依常
例

五西亞絲纒又合纒曰不亞東剖曰宮東班或東西班
不豎請圓卦卦位贊昔位纒宮豎請圓卦卦位至位位纒
樂宮以樂工出位位位贊曰闔曰又曰位位位位位位
曰位位位位位位位位位位位位位位位位位位位位位
位位位位位位位位位位位位位位位位位位位位位位
位位位位位位位位位位位位位位位位位位位位位位

續文獻通考卷之五十七

皇明進士雲間王圻纂輯

學校考 祠祭下

皇明

凡立學必舉 先師之祀瞽宗在學之典可考也漢世以
前樂祖經師習其道則祀其人蓋未有定祀東京雖以
聖師禮周孔而未始有特廟也廟祀 孔子於學自唐
始夫 孔子修六經扶五教終古所宗承歷代嚴禋典
制未稱我 朝建雍作廟昭揭兩都崇祀儀章光布寰
宇 世宗正名秩禮 先師位號益顯以隆

按後魏太和十三年始立 孔子廟於京師唐高祖武

德二年於國子監立周公 孔子廟各一以四時致祭
 貞觀二年從左僕射房玄齡議停周公祭陞夫子為先
 聖專祀焉歷代因之前元置宣聖廟于燕京舊樞密院
 地我 太祖高皇帝初平江淮即 詣學謁孔子後建
 學金陵作先師廟遂 親行釋菜之禮每歲春秋上下
 則降 御香遣官致祭 列聖以來視學釋奠率敦懿
 典至我 世宗獨再舉焉二丁非輔弼大臣不遣故今
 廟址雖循元舊而制度之崇典禮之密則非前代所能
 及

廟制

國初洪武十五年春作 先師孔子廟今在南京太學左
 正殿七間舊 大成殿今題曰先師廟高三丈六尺闊
 十三丈一尺深七丈一尺露臺東西八丈八尺南北四
 丈五尺基高六尺上有石欄杆前有石階級左右石階
 級各一殿之東掖為祭器庫十一間高一丈五尺每間
 闊一丈三尺深一丈三尺基高一尺八寸西掖為樂器
 庫十一間高闊深入與祭器庫同東廡十九間高一丈
 六尺每間闊一丈三尺深一丈八尺基高二尺當廡門
 之中有小階級西廡間數并階級同內墀東碑亭一座
 御製新建太學碑樹焉碑文見前西井一口石甃兩
 墀雜植松檜槐栢共六十一株兩廡之南折而北向為
 東西序各十一間門各高一丈五尺每間闊一丈三尺

深一丈三尺基高一尺八寸兩序之中爲大成門今題曰廟門五間中門三東西各列戟十二門高二丈二尺闊七丈九尺前後深四丈八尺基高五尺週環石欄杆前後各石階級三門內石鼓各五西石鼓文音訓碑一通別錄于後門外東神廚五間宰牲亭三間井亭一座井一口石甃西神庫五間持敬門一間致齋所三間外墀東元加封聖號詔書碑一通大德十一年七月十九日建碑文錄祀典下西元加封先聖父母妻并顏曾思孟制詞碑一通至順二年九月建制詞亦錄祀典下東西各有南北對廊樹歷科進士題名碑今四十七座雜植松柏共五十七株櫺星門三間隔衛爲屏牆牆下地

一方東西闊七丈五尺深四丈爲木欄以護焉 廟中

正座舊爲 大成至聖文宣王塑像 唐玄宗二十七年

詔曰弘我王化在乎儒術發輝此道啓迪含靈自生民以來未有如孔子者也所謂自天攸縱將聖多能德配乾坤功揭日月故能立天下之大本成天下之大經美政教善風俗君君臣臣父父子民到于今受其賜不其偉歟雖代有褒稱未爲崇峻不副其實人其謂何夫子改稱先聖可追謚爲文宣王令三公持節冊命其後嗣褒聖侯改封嗣文宣公 宋真宗大中祥符元年十一月制曰王者順考古道懋建大猷崇四術以化民昭宣教本總百王而致治不變人文方啓迪於素風思

丕揚於鴻烈先聖文宣王道膺上聖體自生知以天縱之多能實人倫之先覺玄功侔乎簡易景鑠配乎貞明惟列辟以尊崇為億載之師表肆朕以寡昧欽承命曆曷嘗不遵守彝訓保乂中區屬以祗若元符告成喬嶽觀風廣魯之地飭駕數仞之牆躬詣遠祠緬懷遐躅仰明靈之如在肅奠獻以惟寅是用稽簡冊之文昭聰獻之德聿舉追崇之禮庶申嚴奉之心備物典章垂之不朽誕告多士昭示朕意宜追謚曰玄聖文宣王

聖祖諱改謚為至

元大德十一年加封聖號詔曰蓋聞先孔子而聖者非孔子無以明後孔子而聖者非孔子無以法所謂祖述堯舜憲章文武儀範百王師表萬世者也

朕纂承丕緒敬仰休風循治古之良規舉追封之盛典加號為大成至聖文宣王遣使闕里祀以太牢於戲父子之親君臣之義永惟聖教之尊天地之大日月之明奚罄名言之妙尚資神化祚我皇元 至順二年封先聖夫人制曰我國家惇典禮以彌文本閨門以成教迺睠素王之廟尚虛元媿之封有其舉之斯為盛矣大成至聖文宣王妻開官氏來嬪聖室垂裕世家籩豆出房因流風於殷禮琴瑟在御存燕樂於魯堂功言邈若於遺聞儀範儼乎其合德作爾禕衣之象稱其命鼎之銘噫秩秩彞倫吾欲廣關雎鵲巢之化皇皇文治天其興河圖鳳鳥之祥可特封大成至聖文宣王夫人 下四

配制年月同 東配爲堯國復聖公制曰朕惟得孔氏之門入聖人之域顏子一人而已觀其不遷怒不貳過已成復禮之功無伐善無施勞益著爲仁之效益將不日而化矣惜乎天不假之以年也朕緬懷哲人留心聖學將大彰於風教故特示於褒嘉於戲用之則行舍之則藏雖潛德一時之不顯吾見其進未見其止顧聖言百世而彌彰尚服寵光丕隆文治可加封堯國復聖公沂國述聖公制曰昔曾子得聖人之傳而子思克承厥統稽夫中庸之一書實開聖學於千載朕自臨御以來每以嘉惠後學爲念萬幾之暇覽觀載籍至中和而天地位萬物育雅留意焉夫爵秩之榮旣隆於升配景

行之懿可後於褒加於戲有仲尼作於前孰儼世家之美得孟氏紹其後益昌斯道之傳渥命言承茂隆丕緒可加封沂國述聖公 西配爲邾國宗聖公制曰朕惟孔子之道曾氏獨得其宗蓋本於誠身而已也觀其始於三省之功繼聞一貫之妙是以友於顏淵而無愧授之思孟而不湮者與朕仰慕休風景行先哲爰因舊爵崇以新稱於戲聖神繼天立極以來道統之傳遠矣國家化民成俗之效大學之書具焉其相予之脩齊茲式彰於褒顯可加封邾國宗聖公 鄒國亞聖公制曰孟子百世之師也方戰國之縱橫異端之充塞不有君子孰任斯文觀夫七篇之書惓惓乎致君澤民之心凜凜

乎拔本塞源之論黜伯功而行王道距詖行而放淫辭
可謂有功聖門追配神禹者矣朕遠稽聖學祗服格言
乃著新稱益彰渥典於戲誦詩書而尚友緬懷鄒魯之
風非仁義則不陳期底唐虞之治莫風千載蔚有耿光
可加封鄒國亞聖公 殿左東哲五位爲貴公閔損薛
公冉雍黎公端木賜衛公仲由魏公卜商 殿右西哲
五位爲鄧公冉耕齊公宰子徐公冉求吳公言偃陳公
顓孫師 唐玄宗開元二十七年八月制曰門人三千
見稱十哲包大衆美實超等夷暢玄聖之風規發人倫
之耳目並宜褒贈以寵賢明其顏子旣稱亞聖宜頒優
秩追贈子淵死公子騫費侯伯牛鄒侯仲弓薛侯子有

徐侯子路衛公子我齊侯子貢黎侯子游吳侯子夏衛
侯曾參等六十七人皆封伯 宋神宗元豐六年詔封
孟軻爲鄒聖公配食於兗公之次 度宗咸淳三年正
月陞曾參封郕國公孔汲封沂國公配食大成顓孫師
升十哲 東廡五十五位爲金鄉侯澹臺滅明任城侯
原憲汝陽侯南宮适萊蕪侯曾點須昌侯商瞿平輿侯
漆雕開睢陽侯司馬耕平陰侯有若東阿侯巫馬施陽
穀侯顏辛上蔡侯曹卹枝江侯公孫龍馮翊侯秦商靄
澤侯顏高上邽侯壤駟赤成紀侯石作蜀鉅平侯公夏
首膠東侯后處濟陽侯奚容蒧富陽侯顏祖滏陽侯句
井疆鄆城侯秦祖即墨侯公祖句茲武成侯縣成沂源

侯燕伋宛句侯顏之僕建成侯樂欵堂邑侯顏何林慮
 侯狄黑鄆城侯孔忠徐成侯公西歲臨濮侯施之常華
 亭侯秦非文登侯申棖濟陰侯顏澮泗水侯孔鯉蘭陵
 伯荀况睢陽侯穀梁赤萊蕪伯高堂生樂壽伯毛萇彭
 城伯劉向中牟伯鄭眾緱氏伯杜子春良鄉伯盧植司
 空王肅司徒杜預昌黎伯韓愈豫國公程顥新安伯邵
 雍溫國公司馬光建寧伯胡安國華以伯張斌將樂伯
 楊時弘治中增魏國公許衡元二皇慶元年增西
 廡五十五位為單父侯宓不齊
 夫公治長北海侯
 公哲長曲長存彥無錫共城侯高柴壽張侯公伯齊益
 都侯樊須鉅野侯公西赤千乘侯梁鱣臨沂侯冉肅

陽侯伯虔諸城侯冉季濮陽侯漆雕哆高宛侯漆雕徒
 父鄒平侯商澤當陽侯任不齊牟平侯公良孺新息侯
 秦冉梁父侯公肩定聊城侯鄔單祈鄉侯罕父黑淄川
 侯申黨厭次侯榮旂南華侯左人郢胸山侯鄭國樂平
 侯原亢胙城侯廉潔博平侯叔仲會高唐侯邾異臨胸
 侯公西與如內黃侯遽伯王長山侯林放南頓侯陳亢
 陽平侯琴張博昌侯步叔乘中都伯左丘明臨淄伯公
 羊高乘氏伯伏勝考城伯戴聖曲阜伯孔安國廣川伯
 董仲舒岐陽伯賈逵扶風伯馬融高密伯鄭康成任成
 伯何休偃師伯王鞠新野伯范甯道國公周惇願洛國
 公程頤郟伯張載徽國公朱熹開封伯呂祖謙宋理宗

景定二年增崇安伯蔡沉浦城伯真德秀臨川郡公吳澄俱正統中增入 以上塑像封謚至嘉靖中皆撤革

太祖洪武初年翰林國史院學士承旨詹同侍講學士樂韶鳳上文廟釋奠樂章舞六佾禮部尚書牛諒上禮儀

制曰可遣御史大夫陳寧釋奠時誠意伯劉基陪祭不至已而受胙爲丞相胡惟庸所論劾 上曰基學聖

人之道不陪祀使弗學者何以勸既不與祭而享胙禮乎奪俸一月寧坐不舉亦奪半月 二年 詔以大牢

禮祭先師孔子于國學以歲仲春秋上下傳 制遣官以丞相初獻翰林學士國子祭酒亞終獻已而又遣使詣曲阜致祭曲阜孔子故里也使者陸辭 太祖諭之

曰仲尼之道廣大悠久與天地相並故後世有天下者莫不致敬蓋禮脩其祀事朕今爲天下主期在明教化

以行先聖之道今旣釋奠國學仍遣爾脩祀事于闕里爾其敬之 是後壬戌夏四月丙戌 詔天下通祀孔

子遂 賜學糧增師生廩膳 上諭禮部尚書劉仲質曰孔子明帝王之道以教後世使君君臣臣父父子

綱常以正彝倫攸叙其功參乎天地今天下郡縣廟學並建而報祀之禮止行京師豈非缺典卿與儒臣其定

釋奠禮儀頒之天下學校令每歲春秋仲月通祀孔子乃有是 詔

初定制以春秋上下 皇帝御奉天殿傳 制遣大臣

以太宰祭 至聖先師孔子於太學南京太學遣祭酒
禮三獻樂六奏文舞六佾司府州縣衛學各提調官行
事用少牢禮樂如太學樂不能備則已京府及附府縣
行釋菜禮殿中先師南向復聖顏子宗聖曾子述聖子
思子亞聖孟子配享東西相向先賢閔損冉耕冉雍宰
予端木賜冉求仲由言偃卜商顓孫師十哲從祀亦東
西相向兩廡從祀先賢澹臺滅明宓不齊原憲公冶長
南宮适高柴漆雕開樊須司馬耕公西赤有若琴張申
棧陳亢巫馬施梁鱣公皙哀商瞿冉孺顏幸伯虔曹卹
冉季公孫龍漆雕徒父顏高商澤壤駟赤任不齊石作
蜀公良孺公夏首公肩定后處鄔單奚容蒧于父黑顏

祖榮旂秦祖左人郢句井疆鄭國公祖句茲原亢縣成
廉潔燕伋叔仲會顏之僕邾異樂欬公西輿如狄黑孔
忠公西蒧步叔乘施之常秦非顏噲先儒左丘明公羊
高穀梁赤伏勝高堂生孔安國毛萇董仲舒后蒼杜子
春王通韓愈胡瑗周惇頤程顥歐陽脩邵雍張載司馬
光程頤楊時胡安國朱熹張栻陸九淵呂祖謙蔡沉真
德秀許衡九十一人 是日子夜先祭啓聖公孔氏用
少牢先賢顏無繇曾點孔鯉孟孫氏左右配享兩廡先
儒程珦朱松蔡元定從祀 時江西崇仁縣訓導羅恢
上疏云孔廟從祀當以道學論當時有若優于宰我論
語記有若言行者四皆有裨世教記宰予言行者四皆

見貢聖人宜以有若居十哲而宰予居兩廡公伯寮阻壞聖門不宜從祀。遠伯玉孔子故人行年六十而化今在兩廡六十位次之下未當宜例陞孔聖廟不報恢江西永豐人三年五月詔正祀典惟孔子封爵仍舊

是時上如江淮府先謁文廟幸學至南昌亦如之

四年國子司業宋濂上孔子廟堂議曰世之言禮者咸取法於孔子不以古之禮祀孔子褻祀也褻祀不敬不敬則無福柰何今之人與古異也古者主人西面几筵在西也漢章帝幸魯祠孔子帝西面再拜開元禮先聖東向先師南向三獻官西向猶古意也今襲開元二十七年之制遷神南面非神道尚右之義矣古者木主棲

神天子諸侯廟皆有主大夫束帛士結茅為叢無像設之事開元禮設先聖神座於堂上兩楹間先聖東北皆莞席尚掃地而祭也今因開元八年之制搏土而肖像焉矣神而明之之義矣古者灌鬯燭蕭求神於陰陽也今用熏蕪代之非簡乎古者朝覲會同郊廟祭饗皆設庭燎司烜共之火師監之示嚴敬也今以秉炬當之非瀆乎古之有道有德者使教焉死則以為樂祖祭於瞽宗謂之先師若漢禮有高堂生樂有制氏詩有毛公書有伏生也又凡始立學者必釋奠於先聖先師釋奠必有合謂國無先聖先師則所釋奠者當與鄰國合若唐虞有夔伯夷周有周公魯有孔子則不合也當是時學

續文獻通考卷之五十七
四百七十二原
者各祭其先師非其師弗學非其學弗祭學校既廢天下莫知所師孔子集羣聖之大成顏曾思孟實傳其道尊之以爲先聖先師而通祀於天下固宜若七十二子止於國學設之庶幾弗悖禮意開元禮國學祀先聖孔子以顏子等七十二賢配諸州惟配顏子今以苟况之言性惡楊雄之事王莽王弼之宗莊老賈逵之忽細行杜預之建短喪馬融之黨附勢家亦廁其中吾不知其何說也古者立學專以明倫子雖齊聖不先父食久矣故禹不先鯀湯不先契文王不先不窟宋祖帝乙鄭祖厲王猶尚祖也今回參攷坐饗堂上而其父列食於廡間顛倒彛倫莫此爲甚吾不知其何說也古者士見師

以菜爲贄故始入學者必釋菜以禮其先師其學官時祭皆釋奠今專用春秋非矣釋奠有樂無尸釋菜無樂是二釋之重輕以樂有無也今襲用魏漢律所製大晟樂乃先儒所謂亂世之音可乎哉古者釋奠釋菜名義雖存而儀注皆不可考開元禮彷彿儀禮饋食篇節文爲詳所謂三獻獻後各飲福卽尸酢主人主婦及賓之義也今憚其煩唯初獻得行之可乎哉他如廟制之非宜冕服之無章器用雜乎雅俗升降昧乎左右此類甚多雖更僕不可盡若乃建安熊氏欲以伏羲爲道統之宗神農黃帝堯舜禹湯文武次而列焉臯陶伊尹太公周公暨稷契夷益傳說箕子皆天子公卿之師式宜秩

祀天子之樂若孔子實無祖述憲章之任其為通祀則自天子下達苟如其言則道統益尊三皇不汨於醫師太公不辱於武夫矣昔周立四代之學學有先聖虞庠以舜夏學以禹殷學以湯東膠以文王復各取當時左右四聖成其德業者為之先師以配享焉此固天子立學之法也 上不喜譎濂安遠知縣

時令進士釋褐行釋菜禮更定釋奠祭器禮物擇監生及文職大臣子弟在學校者充樂舞生 五年罷孟子配享踰年 上曰我聞孟子辯異端闢邪說發明孔子之道宜配享如故 七年仲春上丁日食改仲丁致祭 十五年作文廟成遣官以太牢祭 上遂視學釋菜

始 詔司府州縣衛學通祀孔子頒釋奠儀正嶽鎮海瀆城隍忠臣烈士封號惟大成至聖文宣王及配享從祀諸賢儒封爵如故 十七年議大成樂 二十六年頒大成樂器於天下府學令州縣學式於府學 二十九年從行人司副楊砥議罷楊雄從祀進董仲舒配享成祖即位之八月遣官釋奠先師 永樂八年正文廟聖賢繪塑衣冠

英宗正統元年用禮官議刊定文廟從祀名爵位次頒行天下 二年進宋儒胡安國蔡沉真德秀從祀 三年禁祀孔子於釋老宮令祭物非土地所產者以所產代 八年從輔臣楊士奇議追封吳澄為臨川郡公從祀

景皇帝景泰六年從太常寺奏加兩京太學兩廡祭物
憲宗成化二年追封仲舒廣川伯安國建寧伯沉崇安伯
德秀浦城伯

世宗嘉靖九年 上用大學士張孚敬等議釐正祀典撤
去塑像改 大成至聖文宣王爲 至聖先師孔子神
位木主高二尺三寸七分闊四寸厚七分座高四寸長
七寸厚三寸四分朱地金書四配爲復聖顏子宗聖曾
子述聖子思子亞聖孟子神位木主各高一尺五寸闊
三寸二分厚五分座高四寸長六寸厚二寸八分十哲
以下凡及門弟子皆止稱先賢某子神位木主各高一
尺四寸闊二寸六分厚五分座高二寸六分長四寸厚

二寸左丘明以下稱先儒某子神位木主各高一尺三
寸四分闊二寸三分厚四分座高二寸六分長四寸厚
二寸俱赤地黑書申黨申棖二人疑以據論語爲證乃
存棖去黨而公伯寮秦冉顏何荀况戴聖劉向賈逵馬
融何休王肅王弼杜預吳澄十三人俱罷從祀林放蘧
瑗鄭玄鄭眾盧植服虔范甯七人令各祀於其鄉后蒼
王通歐陽脩胡瑗四人增入從祀用故詹事兼翰林院
學士程敏政之言也尋用行人薛侃議增陸九淵於是
東廡從祀四十七位爲澹臺滅明原憲南宮适商瞿漆
雕開司馬耕有若巫馬施顏辛曹卹公孫龍秦商顏高
壤駟赤石作蜀公夏首后處奚容蒧顏祖句井疆秦祖

公祖句茲縣成燕汲顏之僕施之常秦非申棖顏噲穀
梁赤高堂生毛萇后蒼杜子春韓愈程顥邵雍司馬光
胡安國張栻楊時陸九淵許衡西廡從祀四十四位爲
宓不齊公冶長公皙哀高柴樊須公西赤梁鱣冉孺伯
虔冉季漆雕開漆雕哆漆雕徒父商澤任不齊公良孺
公肩定鄔單罕父黑榮旂左人郢鄭國原亢廉潔叔仲
會邾異公西輿如陳亢琴張步叔乘左丘明公羊高伏
勝孔安國董仲舒王通周敦頤歐陽脩張載程頤胡瑗
朱熹呂祖謙蔡沉真德秀凡舊封公侯伯爵盡皆革去
仍改大成殿爲先師廟大成門爲廟門時徐階疏辨改
號易像爲非宜 帝怒切責之旣而復疏曰聖謨洋洋
非臣所能窺測 上謂其諛佞謫延平推官且立佞人
碑 十一月奉 詔行兩京國子監責令祭酒等官通
行改正以稱崇儒重道之意於是 車駕重幸太學仍
行南京遣官祭焉

慈利縣學教諭蔣明於宣德十年四月疏言有功於道
學者皆得從祀若元儒吳澄未見舉行行在禮部尚書
胡濙以聞 上命濙會同少傅兵部尚書無華蓋殿大
學士楊士奇等議士奇等議曰考得元翰林學士吳澄
所著書及奎章閣侍書學士虞集所狀澄事行蓋澄自
十歲得宋儒朱熹所註大學讀之即知爲學之要專勤
誦讀次讀語孟中庸亦然遂大肆力於諸經十五專務

聖賢之學致踐履之實以道自任其所自勵有勤謹敬和自新自脩消人欲長天理克己悔過矯輕警惰顏冉理一等銘蓋學者有學基學統等篇深得濂洛關閩之旨考蓋校定易書詩春秋修正儀禮小戴記及邵雍張載之書有易春秋禮記纂言及易纂言外翼皆所以啓大道之堂奧開來學之聰明傳之百世而無弊也時朝廷屢起之乃就國子監丞稍進司業一言不合即自解去後屢徵復起亦不久於位進退之際卓然君子蓋元之正學大儒許衡及澄二人衡遭世祖功在朝廷澄在朝之日雖淺其職論思教成均勸講經筵咸積誠意預大議論大事咸引古道而功在學者尤多故二人之沒皆謚文正衡在當時已列從祀澄既後出又卒於元衰之際當時已有建議宜列從祀者屬元綱日頽未及舉行今澄所著諸書具在我 國家崇儒重道大明四書五經及性理之旨凡澄所言皆見采錄以惠學者蓋澄問學之功朱熹以來莫或過之而從祀諸賢自荀况下至范甯語其事功皆未及澄今若升澄從祀孔子廟庭列諸許衡之次允愜斯文之公議昭 國家之盛典矣

祭酒周洪謨於成化十二年七月奏請加孔子封號改大成至聖爲神聖廣運疏畧曰若謂孔子陪臣不當稱帝則先儒羅從彥嘗曰唐既封先聖爲王襲其舊號可

也加之帝號而褒崇之亦可也所封乃當時天王之王
既正南面之位宜服冕十二旒衣十二章十籩十豆各
增爲十二六佾之舞增爲八佾之舞且古者鳴球琴瑟
堂上之樂笙鏞祝敔堂下之樂而干羽舞于兩階今舞
羽居上而樂器居下非古制也宜令典樂者改正上
命禮官議之於是尚書鄒幹上言正統十二年三月巡
按直隸御史李奎奏請加封孔子 英宗皇帝制曰孔
子萬世帝王所尊已有大成至聖之號 祖宗以來既
仍其舊不必增益今神聖廣運出於伯益替堯之詞不
若大成至聖本於孟子中庸猶可以擬議也洪武中新
建南京太學止用神主不設塑像故當時祭酒宋訥奏

勅撰文有像不土繪祀以神主百年夷習乃革之語
今北監所有塑像皆因元舊不忍撤毀耳以此觀之冕
旒蓋因塑像之舊亦非 聖朝之制而籩豆佾舞之數
則 祖宗斟酌已有定式矧易謚號加器數舉不足爲
孔子重輕所貴乎孔子之道者在身體力行乃尊崇之
實耳所據加封籩豆佾舞俱當仍舊惟佾舞居下則行
太常寺考正之 上是其言 九月壬子洪謨等題臣
近言孔子封號冕服籩豆佾舞等事禮部尚書鄒幹等
叅稱洪武年間新創南京太學止用神主不設塑像今
國子監有塑像者不過因前元之舊亦非 聖朝之制
臣以爲不然自古帝王之有天下莫不因所當因革所

當革我 太祖高皇帝正祀典百神封號凡前代所封者盡行革去惟孔子封號仍存其舊天下郡縣元時三皇廟像以民間不可褻瀆亦皆革去惟孔子塑像除南京太學用神主外天下府州縣學元時塑像悉存其舊所因所革皆以定一代之規垂萬世之法豈可謂所革者為 聖朝之制而所因者非 聖朝之制乎又謂謚號器數之加否不足為孔子重輕所貴乎孔子之道者在身體力行乃為尊崇之實臣以為孔子之道不外乎禮樂今欲體孔子之道亦莫先乎禮樂若不能備其禮樂則無以將其誠敬報本之義既踈體道之功安在今查得唐開元中始封孔子為文宣王被以袞冕樂用宮

懸當時袞冕之名通乎上下天子之袞冕十二旒十二章一品之袞冕九旒九章宮懸者天子之樂也樂既用天子之宮懸服必用天子之袞冕是唐之奉孔子者已用天子之禮樂矣今冕服既用天子之禮而佾舞則用諸侯之樂以禮論樂則樂不備以樂論禮則禮為僭禮既不明樂又不稱孔子在天之靈必所不享夫禮樂之因於前元者既又缺畧則法制之明於 聖朝者當為釐正若復因循不加釐正後世君子必見非笑如蒙准言乞 勅內閣大臣并六部三法司六科十三道等官計議首則正其封號合無表明孔子周人當用周制其所封乃當天王之王非後世國王之王故從前代以來

皆用天子冕服封號既正則冕服與封號相稱而禮不為僭矣次則增其器數合無將十籩十豆為十二籩十二豆六佾之舞為八佾器數既加則舞佾與冕旒相稱而樂不為缺矣禮明樂備則可以格聖靈可以厚風化可以補前代缺畧之典可以備 聖朝尊崇之制題奉

聖旨是尊崇孔子是朝廷盛典籩豆增為十二六佾增為八佾通行天下該衙門知道自是丁祭羽舞始居下焉

學士程敏政於弘治元年考正祀典疏曰臣聞古聖王之治天下必以祀典為重所以崇德報功而垂世教淑人心也故有功德於一時者一時祀之更代則已有功德於一方者一方祀之踰境則已然猶欲以觀一時範一方而不敢輕議焉况先師孔子有功德於天下萬世天下祀之萬世祀之則其廟廷之間侑食之人豈可苟焉而已必得文與行兼名與實副有功於聖門而無疵于公議者庶足以稱崇德報功之意若侑食者非其人則豈惟先師臨之神不顧歆將使典模範者莫知所教為弟子者莫知所學世教不明人心不淑通于天下而施及後世其為關繫豈特一時一方之可比哉邇者言官欲黜文廟從祀諸賢之有罪者 詔禮部集議臣愚亦在預議之列疑其所言尚有未盡而議者相持憚於改作臣考之於書揆之於心不敢妄為異同謹畫一條

陳上瀆 聖覽伏乞 皇上丕顯文謨主張斯道仍下
禮部通行集議采而行之一洗前代相習之陋永為百
世可遵之典使世教有興起之益人心得趨向之公其
於治道未為無補 一唐貞觀二十一年始以左丘明
等二十二人從祀孔子廟庭蓋當是時聖學不明議者
無識拘于註疏謂釋奠先師如詩有毛公禮有高堂生
書有伏生之類遂以專門訓詁之學為得聖道之傳而
并及馬融等行之至今誠不可不考其行之得失與議
之可否而釐正於大明有道之世也臣考歷代正史馬
融初應鄧騭之召為秘書監官南郡太守以貪濁免官
髡徙朔方自刺不殊又不拘儒者之節前授生徒後列

女樂為梁冀草奏殺忠臣李固作西第頌以羨冀為正
直所羞即是觀之則眾醜備於一身五經為之掃地後
世乃以其空言目為經師使侑坐于孔子之庭臣不知
其何說也劉向初以獻賦進嘉誦神仙方術嘗上言黃
金可成鑄作不驗下吏當死其兄陽城侯救之獲免所
著洪範五行傳最為舛駁使箕子經世之微言流為陰
陽術家之小技賈逵以獻頌為郎不修小節專以附會
圖讖以至貴顯蓋左道亂政之人也王弼與何晏倡為
清談所註易傳祖老莊而范甯追究晉室之亂以為王
何之罪深於桀紂何休則止有春秋解詁一書黜周王
魯又註風角等書班之于孝經論語蓋異端邪說之流

也戴聖爲九江太守治行多不法懼何武劾之而自免
後爲博士嬰武於朝及子賓客爲盜繫獄而武平心決
之得不死則又造謝不慙先儒謂聖禮家之宗而身爲
賊吏子爲賊徒可爲世鑒王肅在魏以女適司馬昭當
是時昭篡魏之勢已成肅爲世臣封蘭陵侯官至中領
軍乃坐觀成敗及母丘儉文欽起兵討賊肅又爲司馬
師畫策以濟其惡若好人佞已乃其過之小者杜預所
著亦止有左氏經傳集解其大節益無可稱如守襄陽
則數饋遺洛中要人曰懼其爲害耳非以求益也伐吳
之際因斫癭之譏盡殺江陵之人以吏則不廉以將則
不義凡此諸人其於名教得罪非小而議者謂能守其
遺經轉相授受以待後之學者不爲無功臣竊以爲不
然夫守其遺經若左丘明公羊高穀梁赤之於春秋伏
勝孔安國之於書毛萇之於詩高堂生之於儀禮后蒼
之於禮記杜子春之於周禮可以當之蓋秦火之後惟
易以卜筮僅存而餘經非此九人則幾乎熄矣此其功
之不可泯者以之從祀可也若融等又不過訓詁此九
人所傳者耳况其書行於唐故唐得以備經師之數祀
之今當理學大明之後易用程朱詩用朱子書用蔡氏
春秋用胡氏又何取於漢魏以來駁而不正之人使安
享天下之祀哉夫所以祀之者非徒使學者誦其詩讀
其書亦將識其人而使之尚友也臣恐學者習其訓詁

之文於身心未必有補而考其奸諂淫邪貪墨恠妄之迹將自甘於效尤之地曰先賢亦若此哉其禍儒害道將有不可勝言者至於鄭衆盧植鄭玄服虔范甯五人雖若無過然其所行亦未能以窺聖門所著亦未能以發聖學若五人者得預從祀則漢唐以來當預者尚多臣愚乞將戴聖劉向賈逵馬融何休王肅王弼杜預八人褫爵罷祀鄭衆盧植鄭玄服虔范甯五人各祀於其鄉后蒼在漢初說禮數萬言號后氏曲臺記載聖等皆受其業蓋今禮記之書非后氏則不復傳於後矣乞加封爵與左丘明等一體從祀則偽儒免欺世之名賢者受專門之祀而情文兩得矣 一孔子弟子見于家語

自顏回而下七十六人家語之書出於孔氏嘗得其實而司馬遷史記所載多公伯寮秦冉顏何三人文翁成都廟壁所畫又多蘧瑗林放申枋三人先儒謂後人以所見增益殆未可據臣考宋邢昺論語註疏申枋孔子弟子在家語作申續史記作申黨其實一人也今廟庭從祀申枋封文登侯在東廡申黨封淄川侯在西廡重復無稽一至於此且公伯寮懇子路以沮孔子乃聖門之蝨螻而孔子稱瑗為夫子决非及門之士林放雖嘗問禮然家語史記邢昺註疏朱子集註俱不載諸弟子之列秦冉顏何疑亦為字畫相近之誤如申枋申黨者但不可考耳臣愚以為申枋申黨位號宜存其一公伯

寮秦冉顏何遠瑗林放五人既不載於家語七十子之數宜罷其祀若瑗放二人不可無祀則乞祀瑗於衛祀放於魯或附祭于本處鄉賢祠仍其舊爵以見優崇賢者之意亦庶乎名實相符而不舛於禮也洪武二十九年行人司司副楊砥建議請黜楊雄董仲舒 太祖高皇帝嘉納其言而行之主張斯道以淑人心可謂大矣然荀况楊雄實相伯仲而况以性爲惡以禮爲僞以子思孟子爲亂天下以子張子夏子游爲賤儒故程子有荀卿過多楊雄過少之說今言者欲并黜况之祀宜也然臣竊以爲漢儒莫若董仲舒唐儒莫若韓愈而尚有可議者一人文中子王通是也通之言行先儒之語已多大約以爲僭經而不得比于董韓云爾臣請斷之以程朱之說程子曰王通隱德君子也論其粹處殆非荀揚所及若續經之類皆非其作然則程子豈私於通哉正因其言之粹者而知其非僭經之人耳朱子曰文中子論治體處高似仲舒而本領不及爽似仲舒而純不及又曰韓子原道諸篇若非通所及者然終不免文士之習利達之求若覽古今之變措諸事業恐未若通之精到懇惻而有條理也至於河汾師道之立出於魏晉佛老之餘迨今人以爲盛則通固豪傑之士也今董韓並列從祀而通不預疑爲闕典臣又按宋儒自周子以下九人同列從祀而尚有可議者一人安定胡瑗是也

通鑑卷之五十一 四十一
瑗之言行先儒之論已詳大約以爲少著述而不得比于濂洛云爾臣亦請斷之以程朱之說程子看詳學制曰宜建尊賢堂以延天下道德之士如胡瑗張載邵雍使學者得以矜式朱子小學書亦備載瑗事以爲百世之法臣以爲自秦漢以來師道之立未有過瑗者矧程子於瑗之生也欲致其與張邵並居於尊賢之堂其沒也乃不得與張邵並侑于官聖之廟其爲闕典或又甚矣况宋端平二年議增十賢從祀以瑗爲首若以爲瑗無著述之功則元之許衡亦無著述但其身教之懿與瑗相望誠有不可偏廢者臣考之禮有道有德于教與學者死則爲樂祖祭于贛宗鄉老先生歿則祭于社不

通瑗兩人之師道百世如新得加封爵使與衡得並列祀于學官最得禮意 是年禮科右給事中張九功奏言孔子之道大同天地從祀諸賢豈容或苟如荀况馬融王弼楊雄皆在所當黜今之儒臣禮部侍郎無翰林學士薛瑄在所當入 命禮部會議於是尚書周經等僉言楊雄已黜於洪武時而薛瑄嘗與元儒劉因並欲從祀以大學士楊廷和謂其無所著述而止自餘皆有羽翼聖經之功宜仍舊從祀

南京國子監祭酒謝鐸于四年奏脩明教化六事其三曰正祀典以端教化之本臣愚竊謂孔廟從祀之賢實萬世瞻仰所繫一有不合於天理人心之公何以爲教

化本原之地是誠不可以不正也且所謂十哲七十二子以及左氏以下二十二人其所當黜陟者先儒程子與熊去非已有定論而近時大臣與禮官亦嘗會議但此外猶有不能以無疑者有若龜山先生楊時程門高弟伊洛正傳息邪放淫以承孟氏不愧南軒所稱繼往開來吾道南矣實演晦翁之派雖其晚節一出不克盡從其言而新經之闢誠足以衛吾道論行檢漢儒如馬融戴聖之徒固爲不可幾及論著述宋儒自周程張朱之外恐亦未免有疵如是而不預從祀之列臣竊惑焉又若臨川郡公吳澄著述雖不爲不多行檢則不無可議生長於淳祐貢舉於咸淳受宋之恩者已如此其又

爲國子司業爲翰林學士歷元之官者乃如彼其榮出處聖賢之大節夷夏古今之大防處中國而居然夷狄忘君親而不耻仇虜迹其所爲曾不及洛邑之頑民何敢望首陽之高士昔人謂其專務聖賢之學卓然進退之際不識聖賢之於進退果如是否乎如是而猶在從祀之列臣固不能以無感况二人者皆太學之師其於廟祀黜陟之際尤不可以不正也乞勅陞時以上祔宋諸賢之位斥澄以下從莽大夫之列不惟天下之公論允愜而於世道教化亦不爲無補矣 八年少傅兼

太子太傅吏部尚書謹身殿大學士徐溥等題爲崇祀典以重道學事該禮部手本開送國子監博士楊廷

用奏前事要將宋儒龜山楊時定議從祀孔子廟庭查得成化元年浙江紹興府知府彭誼亦要將楊時從祀及福建將樂縣歲貢生員何昇亦奏前事內稱宋儒朱熹張栻元儒許衡吳澄俱以有功聖門得預從祀而楊時獨不得預近年南京國子監祭酒謝鐸亦以爲言可見後學之心皆有未安合行翰林院查照議擬奏請定奪臣等會同太常寺卿兼翰林院侍講學士程敏政等議得諸儒從祀于孔門者非有功于斯道不可然道非後學所易知也要必取證于大儒之說斯可以合人心之公竊考程氏遺書及朱子伊洛淵源錄所載龜山楊氏行狀墓誌等文俱稱其造養深遠踐履純固溫然無疾言遽色與明道程子相似方其學成而歸程子曰送之曰吾道南矣然則是道也豈易言哉自兩程子嗣孔孟不傳之統及門之士得以道見許者龜山一人而已蓋龜山一傳爲豫章羅氏再傳爲延平李氏以授朱子號爲正宗文定胡氏親承指授而春秋之傳作南軒張氏上溯淵源而太極之義闡心學所漸悉本伊洛使天下之人曉然知虛寂之非道訓詁之非學詞華之非藝則龜山傳道之功不可誣矣崇宣之世京黼柄國躋王安石于配享位次孟子而頌其新經以取士尊王安石爲聖人不復知有孔子誦新經爲聖言不復知有古訓僭聖叛經凡數十年龜山入朝首請黜其配享不令

廟宣聖之廟庭廢其新經不令蠹學者之心術又請罷
綱運以收人心斥和議以張國勢竄權臣以正邦憲培
主德以崇治本竝議謹言雖不盡用然使天下之人知
邪說之當息誠行之當距淫詞之當放則龜山衛道之
功亦不可掩或有疑其出處之際而少其著述之功則
亦有可言者朱子謂龜山之出惟胡文定公之言最公
曰當時若能聽用決須救得一半文定亦曰蔡氏馬能
免之然則以出處見疑者未考之過也龜山值洛學黨
禁之餘指示學者以大本所在體驗之功轉相授受而
朱子得聞其指訣則見于何鎬之書朱子於理一分殊
之論稱其年高德盛而所見益精則見于西銘之跋要

之無龜山則無朱子而龜山之道非知德者殆未可輕
議然則以著述見少者亦未考之過也又按元史至正
二十一年因杭州路照磨胡瑜建言已將龜山與延平
李氏文定胡氏九峯蔡氏西山真氏俱加封爵列于從
祀以世變不及徧行天下此殆近于禮所謂有其舉之
莫敢廢者然則親講於龜山若文定私淑於龜山若朱
張咸在脩食近私淑于朱子若蔡真遠私淑于朱子若
許吳亦在脩食獨其師有傳道衛道之功可以繼往開
來抑邪與正者反不預焉揆之人心誠爲闕典考大儒
之定論參前代之故實伸弟子從師之義慰後學向道
之心以龜山躋于從祀宜合公論伏乞 聖裁奉 旨

允行 十四年國子監管祭酒事禮部右侍郎謝鐸建言維持風教四事其一曰正祀典以究明倫之實臣愚竊惟學校之設皆所以明人倫也人倫莫先於父子子雖齊聖不先父食柰何承訛襲故以顏曾思三子配享堂上而其父則皆列祀廡下冠履倒置有是理哉爲今之計莫若於闕里立廟祀叔梁紇以顏路曾皙孔鯉諸賢配享如先儒能去非之論庶幾各全其尊而神靈安妥也人倫莫大於君臣殷之頑民猶不忍忘紂柰何忘君事仇若吳澄者親爲有宋之遺臣覩顏胡元之官祿名節掃地復何言哉後死之誅正宜律以春秋大義斥其用夷變夏之罪罷黜從祀以列於莽大夫之列庶幾

不掩其惡而人心愜服也此前一事人雖屢言而未見施行此後一事臣亦嘗言而未蒙俞允臣非不知重復覩屢言之誠爲可愧特以每當奉祠對越之際輒起嘔願不安之心心所不安又不得不發之言耳乞 勅禮部翰林院重加考定議處使祀典以正人倫以明則所以維持風教者不淺淺矣

大學士張璁於嘉靖九年歷舉前後諸臣之議奏正孔子祀典祀啓聖公及黜諸從祀之未安者 上一一行

之

諸臣議已見前

其議歐陽脩當從祀曰臣按歐陽脩乃有宋

一代人物未與從祀嘗觀其所著本論實有翊衛聖道之功蘇軾曰自漢以來道術不出於孔氏而亂天下者

多矣五百餘年而後得韓愈學者以配孟氏蓋庶幾焉
愈之後三百有餘年而後得歐陽子其學推韓愈孟子
以達於孔氏故天下翕然師尊之曰歐陽子今之韓愈
也夫韓愈既以從祀歐陽脩豈可少哉

禮部尚書嚴嵩覆薛瑄從祀議曰臣等考之昔者帝王
秩祀孔子以孔子道德刪述有教萬世之功而祀之所
以教民報也諸孔子之徒俎豆堂廡亦以其人躬備道
德能有以羽翼聖學功可祀而祀之而從祀之典通乎
萬世是謂崇德是謂報功自漢以來大儒從祀代不乏
人逮我國朝正統間以宋胡安國蔡沉真德秀元吳
澄從祀弘治間以宋楊時從祀 皇上嘉靖九年又以

宋陸九淵從祀表章先儒寔爲國家盛典而累朝諸臣
若給事中張九功楊廉解一貫都御史姚鏌叅政許讚
俱嘗建議請以本朝名臣禮部侍郎薛瑄從祀謹按瑄
山西河津縣人年甫幼學一見濂洛之書嘆曰此學道
之正脉也即焚棄詞賦以程門居敬窮理爲學之法以
孟子復性爲學之功由壯至老造詣純篤蓋見於大學
士李賢尚書彭韶國子監丞閻禹錫等所撰行狀碑文
者如此瑄所著有讀書錄十卷今觀其書格言要論發
明理道每有新得非體認密切踐履真實者不能至於
立朝行已風槩卓絕有功名教可謂豪傑之崛起聖門
之宗裔矣自瑄之歿言者頌其學術行德凡數十上今

御史楊瞻樊得仁復以爲言若瑄之賢 朝廷特加褒顯以風來學進之從祀誠足以慰衆論之公彰 聖朝之美也然或者之論以爲前代所定從祀必求傳釋六經之人以合祭法報功之義故助孔子垂統之人如二十二經師雖其身有過愆猶應議功之條 本朝所祀四人者安國傳春秋沉註書德秀著大學衍義激著諸經纂言皆以用其書行其道宜有以褒大之也查得先年亦嘗下儒臣議薛瑄從祀然卒鮮有成議者以罕所著述疑之也臣等切惟求士於漢唐之世聖學榛塞固當專錄其釋經之功自有宋諸儒繼出理學大明之後世之儒者雖論述罕傳似當特取其履行之實惟是侑

坐孔庭受職嘉享事重禮殷其選不得不慎臣等謹據漢法有大事中朝逮文學掌故皆以其議上號爲近古今祀典重事必下廷議集衆思斯於事體爲得而據考經典折衷群言又非頃刻立談可盡查得弘治間宋儒楊時從祀該本部奉旨行翰林院諸臣撰議上進伏望 皇上 特勅翰林院詹事府左右春坊國子監諸文學之官令其博考詳論各撰議進呈 御覽以俟 聖明裁擇施行庶盡天下之公使後世罔有遺議奉 聖旨是着翰林院詹事府左右春坊司經局國子監堂上官人各上議諸臣議上謂當祀者二十三人謂姑緩者二人謂不必祀者郭希賢一人禮部覆議曰臣等爲照

薛瑄從祀始見請於臺章繼詳延於廷議諸臣之奏無
非以我祖宗列聖培養作興百有餘年之久孔庭俎
豆宜得其人焉以彰國家之盛則如瑄者庶無忝茲
選矣故集衆之詞無或疵議此推仰先哲之心也而庶
子童承叙謂程朱高弟如羅從彥李侗尹焞黃幹尚未
得祀近時儒者如吳與弼胡居仁陳獻章亦應從祀舍
彼取此似爲未徧贊善浦應麒亦曰俟之後世二臣之
言無非以論必久而後定故聚訟之議不嫌異同此慎
重祀典之意也臣等切惟光嶽氣分世無全士度長絜
短自有可觀薛瑄之造詣其視宋儒雖若有間然實爲
本朝理學之倡必若從祀無以踰瑄臣等推仰先哲

之心與諸臣一也乃若與弼諸人亦皆爲一時士論之
所推許但時同地近臣等難以軒輊決擇於其間矣夫
衆言折諸聖人議禮本諸天子惟茲孔廟之祀關繫
萬世天下之所仰瞻實爲重大伏乞聖明特賜睿斷
以垂式萬世又看得尚書霍韜奏內欲將宋臣司馬光
陸九淵議黜從祀夫司馬光平生所學惟是漢王之議
失父子之倫委爲昧禮若其公忠鯁亮勲業偉俊爲宋
一代名臣無問賢不肖皆知尊信似未可以一青病之
陸九淵資稟高明見道超悟據其學術論議當在薛瑄
之右今議進瑄則九淵似難遽罷臣等又看得司直呂
懷奏內欲將道統正傳皆欲進廟堂系四配之下夫十

哲四科之賢親受聖教者也濂洛諸儒似難越居其上
以上合無只照舊祀伏乞 聖裁嘉靖十九年三月初
五日奉 旨聖賢道學不明士習趨流俗朕深有感焉
薛瑄能自振起誠可嘉尚但公論久而後定宜俟將來
司馬光陸九淵從享與四配等位次具歷代秩祀又經
我 太祖欽定都只照舊今後不許妄議

按孔子及諸賢封爵先儒亦嘗崇之啓聖立祠顏路曾
皙孔鯉改祀議亦發於前代滿宋之能行 國朝洪武
中宋濂解縉始復起其說厥後程謝諸臣相繼闡明之
洪武二十九年黜楊雄進仲舒宣德十年增吳澄正統
二年增胡安國蔡沉真德秀弘治八年增楊時嘉靖九

年用廷議乃正先師位號祀典肇祀啓聖公而諸儒從
祀增后蒼王通歐陽脩胡瑗陸九淵其當罷祀及祀于
鄉者一如宋濂程敏政之言惟 本朝薛瑄從祀類經
請覆尚以世近未行豈非 昭代名賢之盛將不無待
於並舉與若乃著述之求則未必爲定論也

戶科給事中魏時亮於隆慶元年十月請錄真儒以彰
道化舉薛瑄陳獻章王守仁均得聖學真傳宜從祀孔
廟先是給事中趙軌御史周弘祖請以故禮部侍郎薛
瑄從祀御史耿定向亦請以故新建伯兵部尚書王守
仁從祀下禮部議覆薛瑄潛心理道勵志修爲言雖不
專於著述而片言隻簡動示楷模心雖不繫於事功而

續文獻通考卷之三百一十一 四百六十沈忠
三十一
偉節恢猷皆可師法王守仁質本超凡理由妙悟學以致良知爲本獨觀性命之原教以勤講習爲功善發聖賢之旨但瑄則相去百年輿論共服守仁則世代稍近不無異同請 勅翰林院國子監儒臣廣咨博訪撰議進覽仍下本部會同集議以俟 聖斷從之

六科韓楫等十三道御史馬三樂等于五年交章請以瑄從祀下禮部會廷臣雜議至是議曰臣等謹按瑄山西河津縣人方幼年一見濂洛諸書即嘆曰此道學正脉也遂棄去詞賦專心于是其學以復性爲的以居敬窮理爲功以及躬踐履爲實潛心體究至老彌精克養之純超然自得此學問之大原也平生言動舉止悉人

于矩辭受取與一揆諸義居以則孝友無間與人則樂易可親中正足以矯枉闢邪剛 以庶頑立懦此行履之大畧也所著有讀書錄有河汾集雖不專以述作爲事而隻簡片言皆可師法微詞奧義悉合聖謨至今學者莫不尊信而誦習之此著述之大旨也至于立朝行已之際不折節于權門不謝恩于私室不屈法于貴近不懼志于臨刑榮辱無以關其心死生無以易其操此樹立之大節也故一時信從者有河東夫子之稱一代真儒之許至今無異議焉間有疑其著述之寡不知學貴心得道在躬行矧瑄所著書且十餘萬言不爲不多又有言宋時羅從彥李侗諸儒尚未徧祀瑄不應獨

祀者不知從彥等皆講學于大明之日而瑄乃興起于既絕之後課其難易功實倍之惟 陛下博采人言俯加臨決早 賜施行于世教士風非小補也 於是命瑄從祀神主序於先儒呂祖謙之下祭酒馬自強以從祀告于 先師孔子行釋菜禮仍通行天下學校一體遵行

國子監學錄張養蒙於萬曆二十六年四月題為釐正祀典以安神明 一孟軻之父不得築曰孟孫氏蓋訛傳懿子何忌非軻父也宜改書先賢孟激公而懿子亦應從祀兩廡 一林放遠瑗不宜改祀于鄉蓋不見傳記而從祀者不止林放不及門而從祀者不止伯玉况 一探本超乎時尚一出處合乎聖人從祀正協輿論 一蔡元定精詣卓識早聞性道與顏曾之父不同今從啓聖若以沉之故崇報其父非所以彰元定之賢也合將元定改祀文廟東廡 一輔成既得比例于珣松則張載之父自應比例於輔成

續文獻通考卷之五十七終

續文獻通考卷之五十七

魏清之父自燕北國休轉丸
 錄示家姐孫文蘭東燕
 一轉丸鴉醫北國平匪林限
 碧望亦以武之姑崇辨其父非伯以漳示家之賀也合
 一燕示家錄請早端早聞卦直與爾會之父不同今辨
 一林本跡平報尚一出與合平望入辨師五與與論

續文獻通考卷之五十八

皇明進士雲間王圻纂輯

學校考 聖裔 舊考雖載世次欠詳故重述于左 封爵

聖裔 附四氏裔

孔子周靈王二十年巳酉當魯襄公二十一年十月庚子
 生年三十三適周明年魯亂適齊年四十三自齊反魯
 年五十二當魯定公十九年為中都宰遷司空又遷大
 司寇明年會夾谷二十二年墮三都二十四年攝行相
 事誅少正卯齊人歸女樂季桓子受之三日不朝孔子
 行遂適衛年五十七明年過宋適鄭遂至陳居三歲去
 陳適衛衛不用將西見趙簡子臨河不濟自衛復如陳

時魯定公二十七年也哀公四年孔子自陳之蔡明年如葉又還蔡六年有陳蔡之厄楚昭王迎之得免昭王卒孔子自楚反衛年六十四哀公十一年魯以幣召孔子歸而刪詩定書繫易年六十九哀公十四年魯西狩獲麟乃因史記修春秋至獲麟而止哀公十六年孔子卒年七十四其先宋人也周成王封微子啓于宋以奉湯祀啓弟仲衍生宋公稽稽生丁公申申生愍公共共生弗父何自何而下世爲宋大夫何生宋父周周生世父勝勝生正考父正考父生孔父嘉其後奔魯遂爲魯人嘉生木金父木金父生畢夷父畢夷生孔防叔防叔生伯夏伯夏生紇字叔梁爲陬邑大夫娶顏氏女

在禱於尼丘生孔子因名丘字仲尼生時五老降庭二龍遶室其相貌手

二代鯉字伯魚孔子之子學通儒術魯哀公以幣召之稱

疾不行年五十先孔子卒 忠孔子兄之子在七十子之列

三代伋鯉之子字子思對孔子以其父析薪其子弗克負荷是謂不肖孔子忻然曰其克昌乎對魯穆公以除非法之事行周公伯禽之政不能用乃適衛嘗言當我先君周制雖衰君臣正位上下相持若一體然夫欲行其道不執禮以求之則不能入也今諸侯力爭競招英雄以自輔翼彼於此時不自高人將下我不自貴人將賤

我時移世異各有宜也於是在衛經袍無表三旬九食
著書四十七篇曰中庸教授弟子蓋軻之徒數百人年
六十二

四代白伋子字子上請所習於子思 子思曰先人有訓
焉學必由聖故夫子之教必始於詩書而終于禮樂雜
說不與焉白通習群書又善兵法齊威王召白為國相
年四十七

五代求白子字子家通習儒道有遯世之志楚召不仕年
四十五

六代箕求子字子京為魏相年四十六
七代穿字子高箕子傳學沉靜有遁世之志楚魏趙皆召

之不仕嘗折公孫龍白馬非馬之論著儒家語十二篇
名調音餐年五十一

八代謙史記世家作慎字子順又名斌魏安釐王迎以為
相改嬖寵之官以事賢才奪無任之祿以賜有功諸失
職者謗之九月致仕曰不出十年天下其盡為秦乎秦
莊襄王召之不行魏以孔子後封魯文信君年五十七
三子鮒騰樹

九代鮒字子魚一字申該覽六藝秦并天下召為魯國文
通君拜少傅秦焚書乃歸藏書屋壁隱居嵩山陳涉起
聘為太傅仕六月言不用退卒于陳年五十七著孔叢
子 騰字子襄長九尺六寸漢高帝祠孔子封為奉嗣

君亦嘗為惠帝博士遷長沙太傅年五十七生子忠

樹字子文

十代忠字子貞騰子有高志為博士年五十七生武及安

國家語以為子襄生季中季中生武及安國 趙字元

路鮒子 聚字子產樹之子以將軍破楚垓下封蓼平

侯年五十三謚夷 一統志孔子十世孫孔貞該習古今

孔忠也蓋以字為名耳 然不云封褒成侯何也

十一代武字子威為漢文帝博士仕至臨淮太守早卒

安國字子國武帝博士仕至太守訓註經籍 臧聚之

子嗣蓼平侯歷位九卿遷御史大夫辭乞為太常典臣

傳家業

十二代延年字無考博覽群書漢武帝時為博士轉少傅

又遷大將軍年七十一 邛安國子傳家特善詩禮

琳臧之子嗣蓼平侯亦傳家業

十三代霸字次孺幼有奇才漢昭帝時為博士宣帝時為

太中大夫選任皇太子司經遷詹事為高密相元帝即

位拜爵關內侯號褒成君奉天子祀年七十二卒謚烈

驩邛子為博士善春秋三傳 黃琳子坐事失侯

茂黃之弟大司徒光以其祖有功德而邑土廢絕復封

關內侯

十四代福霸之子襲封關內侯奉孔子祀卒年六十二

捷福之弟列校尉諸曹 喜捷弟列校尉諸曹 光喜

續文獻通考卷之五十八 四十三

弟字子夏經學尤明歷輔成哀平三世王莽盛憂懼辭位年七十卒 宣聚之元孫長安公士詔復其家 立

騷之子善詩書教授數百人 安鮒五代孫以殷後封 殷紹嘉公 光武時有孔安封殷紹嘉公恐尊行 為何齊之叔而封在何齊之後也

十五代房福之子襲封關內侯 求光兄之子封寧鄉侯 放光之子歷侍郎嗣博山侯 元立之子為校書郎

與楊雒友善 何齊吉之子封宋公 十六代均房子字長平初名莽避王莽改今名好學有大

才襲封關內侯平帝更封魯國褒成侯追謚夫子為褒成宣尼公王莽篡位拜太尉辭疾還鄉年八十一 奮

捷之孫通左氏春秋光武時守姑臧長賜爵關內侯後 拜武都太守 奇奮之弟著左氏義詁 子建元之子

不仕莽朝闕里荆棘自除 尚霸之曾孫鉅鹿太守 十七代志均子漢光武拜大司馬上幸魯祠孔子封褒成

侯卒謚元成 嘉奮之子城門校尉作左氏說 仁子 建子

十八代損志子字君益漢明帝時襲封褒成侯和帝時徙 封褒亭侯

十九代曜損子字君曜襲褒亭侯 宙霸六世孫太山都 尉

二十代完曜子襲褒亭侯早亡無子以母弟讚之子羨襲 封 昱霸七世孫漢靈帝徵拜議郎補洛陽令自霸至

續文獻通考卷之五十八 五

昱爵位相係卿相牧守五十三人列侯七人 褒宙子為藏張儉而死 融宙次子初為北海相漢獻帝徵為將作大匠大中大夫每譏誚曹操為所害

三十一代羨字子餘魏文帝黃初元年拜議郎封宗聖侯

二十二代震羨子字伯起晉武帝泰始三年改封奉聖亭侯拜太常卿黃門侍郎 衍少好學年十二能通詩書

晉元帝引為安東參軍 潛後漢太子少傅避地會稽

遂為郡人 孟從王肅學

二十三代嶷震子字功成晉襲封奉聖亭侯 啓衍之子

廬陵太守 竺潛之子吳南昌太守 晉史作豫章太守

二十四代撫嶷子晉舉孝廉辟太尉掾襲封奉聖亭侯為

豫章太守 恬竺長子吳侍中選部尚書晉湘東太守

冲竺次子丹陽太守 奕竺少子全椒令有惠化

二十五代懿撫子晉襲封奉聖亭侯 愉恬長子晉左僕

射 侃冲子大司農 倫奕子黃門郎註儀禮一卷

群倫弟少知名晉御史中丞 祇愉弟為太守周札功

曹札為沈充所害祇冒刃收其喪

二十六代鮮懿子字鮮之恢廓有大度好學善誘誨宋文

帝時襲奉聖亭侯後改封崇聖侯 閻愉子建安太守

汪愉少子廣州刺史 安國愉幼子晉左僕射舊譜

避漢博士諱安國但云名國 坦侃之子晉散騎常侍

封晉陵男有集五卷 嚴倫子領尚書有集五卷

二十七代乘鮮子字敬山博學有才魏舉孝廉封崇聖侯

晉閻子尚書令 靜閻次子宋侍中 侯汪子江夏

太守 混坦之子嗣晉陵男爵 道民嚴之子宣城內

史 靖民嚴之子散騎常侍 福民嚴之子太子洗馬

道隆嚴子位至侍中 沉群之孫丞相椽據史沉為群子

二十八代靈珍乘子後魏封崇聖侯 祐晉子有至行

靈符靜之子會稽太守 靈運靜之子著作郎 幼侯

之子 靈產道隆子光祿大夫 廡沉之子廷尉光祿

大夫 景偉安國孫齊散騎常侍

二十九代文恭靈珍子襲封崇聖侯年五十八 道徽祐

之子守志業不仕 珪靈產子散騎常侍 湛之靈

符子 深之靈符子宋比部郎 琇之靈運子宋江夏

內史有吏能 琳之廡子以草書擅名宋侍中御史中

丞有集十卷 璩之廡子楊州從事 滔景儋子梁海

鹽令 遙之冲五世孫宋尚書左丞 靈龜楊七世孫

後魏國子博士

三十代渠文恭子襲封崇聖侯北齊文宣帝改封恭聖侯

後周靜帝進封孔子為鄒國公立後因改封鄒國公

臻琇之子尚書三公郎 珮遙之子齊通直郎據史珮為遙之

孫恐有誤 曄遙之子中書侍郎 士邈琳之子楊州中從

事 總道微兄之子有操行除竟陵王侍郎不至 岱

滔之子歷清要 碩靈龜子後魏南臺丞

續文獻通考 卷之五十八
三十一代長孫渠子襲封鄒國公 休源珮子梁都官尚
書有集十五卷 幼孫臻之子梁無錫令 虔孫臻子
凱士邈子宋御史中丞尋陽王右軍長史行會稽郡
事 道存士邈子南海太守 範岱之子博涉書史
得仁範從祖弟 安齊碩之子青州法曹 微覲從弟
三十二代嗣哲渠次子隋文帝時應制登科襲封鄒國公
煬帝改爲紹聖侯 雲章休源長子揚州別駕 宗範
休源幼子陳中書黃門侍郎 與幼孫之子陳中書令
有集十五卷 長公覲之子 徵長公從父弟 頴達
八歲日記千餘言大業中舉明經高第仕至司業祭酒
常侍撰五經孝正義集五卷年七十五

三十三代德倫嗣愬子唐高祖改封褒聖侯 伯恭宗範
子陳散騎常侍 紹安與第五子唐中書舍人有集五
卷 紹新與之子以文學知名 紹忠與之子鄱陽東
曹掾 志玄頴達長子唐國子司業 志約頴達少子
禮部郎中 思政得仁孫端州刺史
三十四代崇基德倫子武后時襲封褒聖侯 德紹伯恭
子隋秘書省正字 稱紹安長子 楨紹安次子絳州
刺史 構紹安少子贈蒲州刺史 惠元志玄子國子
司業 頴達後三世爲司業 琮志約子洪州都督
圭志亮子
三十五代遂之崇基于字藏暉唐明皇時襲封褒聖侯開

續文獻通考卷之五十八 四百五十一

元二十七年追謚孔子為文宣王因改璵之為文宣公

昌寓德紹子貞觀中對策高第為膳部郎中 季詡

楨之子登制科終左補闕 若思構長子禮部侍郎

仲思若思弟給事中 立言惠元子黃州刺史 務本

穎達族孫滄洲東光令

三十六代萱璵之子襲封文宣公兼兗州泗水令 舜昌

寓子監察御史 至若思子著作郎明氏族學 如珪

務本子海州司戶

三十七代齊卿萱之子一作齊賢唐德宗時襲封文宣公

齊參舜之子寶鼎令 岑父如珪子著作佐郎 巢

父岑父弟仕至御史大夫陝華招討使

三十八代惟暉齊卿子唐憲宗元和十三年襲封文宣公

年六十五 惟昉齊卿子兗州參軍 克符齊參長子

至孝隱嵩山 克讓齊參子 述睿齊參子德宗時拜

諫議大夫 載岑父長子貞元二十七年及第 錢岑

父子舉進士仕至禮部尚書年七十四韓愈銘其墓

威岑父子及第掌澤潞書記知盧從史必敗謝病歸

戡岑父子舉明經仕至京兆尹御史大夫 戡岑父幼

子

三十九代策明經及第襲封文宣公 敏行述睿子仕至

集賢學士 溫資太子少保 溫質錢長子四門博士

溫孺錢子明經 溫憲錢子明經 溫裕錢第四子

續文獻通考卷之五十八 九

舉進士太平軍節度使 溫業戡長子第二人及第為

吏部侍郎 溫諒戡之子

四十代振唐懿宗咸通四年狀元及第仕至刑部員外郎

襲封文宣公年七十四 極振之弟中和二年狀元及

第歷侍郎 郁極之弟 絢溫質子及第 綸溫質子

及第歷殿院 纁溫質子狀元及第 緯溫孺子狀元

及第相僖宗昭宗 緣明經及第 照及第 織戡之

孫 總戡之孫 緒溫裕之子 軻令 續溫諒子

四十一代昭儉襲文宣公 述郁之子 昌明照之子第

七人及第 昌庶照之子及第為虞部郎中 昌廣織

之子 昌勗緯之子及第仕至散騎常侍 昌鵬織之

子 邈第五人及第仕至諫議大夫 邁織之子乾符

四十二代光嗣泗水令陵廟主 莊昌庶子晉太常少卿

四十三代仁玉長七尺善六藝襲封文宣公後周高祖謁

祠廟令兼監察御史 承恭莊之子將作監

四十四代宜仁王子字不疑幼聰悟宋乾德四年拜章闕

下自叙家門授曲阜縣主簿太宗命為星子宰襲封文

宣公雍熙二年沒於邊年四十六 憲仁玉次子及第

工部侍郎致仕 勗仁玉少子勗子道輔知鄉郡在具

慶下侍立年八十九

四十五代延世宜長子字茂先魁梧大度宋真宗朝以長

葛令襲封文宣公賜束帛銀器及太宗御書并九經等書卒年三十八 延澤宜次子及第贈諫議大夫 延握宜幼子知集州清化縣 延之居江西新喻縣慶曆間舉進士九遷至司封郎中平生惟與周敦頤曾鞏友善 道輔勗長子及第仁宗朝以剛毅直諒聞天下知諫院為御史中丞請明肅皇太后歸政天子郭后廢伏閣爭得罪後復召為御史中丞出知鄆州道病卒 良輔勗次子慷慨長於吏才至大理寺丞 彥輔勗少子幼聰悟性至孝官至國子博士 四十六代聖祐延世子宋天禧五年以光祿寺丞襲封文宣公年三十五卒無嗣以堂弟宗願承襲與聖祐共為

一代宗愿者宜次子延澤十字子莊博涉書史嘉祐中用祖無擇之言改封為衍聖公 舜亮道輔長子左中散大夫致仕著粹籍 宗翰道輔次子刑部侍郎與兄皆鎖廳及第 宗壽良輔長子承議郎 宗質良輔次子仙源丞 漢英彥輔長子幼慧博覽 宗慤彥輔次子 宗旦邕州司戶參軍 旼隱居汝州父亡廬墓三年卧破棺中日食米一溢壁間生紫芝數十本州以行義聞特賜旌表按一統志作孔子四十六代孫 文仲延世之長子嘉祐間舉進士哲宗時官中書舍人有文集五十卷 武仲延世之次子嘉祐間舉進士累官禮部尚書有雜文總百餘卷 平仲延世之季子治平間

舉進士累官金部郎中有續世說等書行世按一統志作孔子四十八世孫八疑六字之誤

四十七代若蒙宗愿子字公明襲封衍聖公宋元祐二年改封奉聖公坐事廢以弟若虛襲封 若虛字公實元符元年襲封豐熙間專主祀事不任他職大觀中復為衍聖公 若愚宗愿子及第 若升舜亮子以朝散郎致仕 傳舜亮少子舊名若古博涉群書操行介潔建炎中興拜疏闕下叙家門舊典始寓居三衢於是孔氏有因仕而家于雪川新安臨川鄂渚者皆自此而分 傳知邠陝撫三州有政績自號杉溪進續白氏六帖文樞要紀書東家雜記杉溪集宮至中散

大夫年七十五 恢朝散大夫 惇朝散大夫 忱文

林郎 恂奉議郎 右宗翰四子 若涉若陟若訥若采若晦若

時 右宗壽六子 若采迪功郎先是崇寧三年詔孔子後與親

屬一名判司簿尉孔宗哲死若采繼之 若谷若惠 右宗

質二 若盤漢英子 若鑑若初及第若師若冲若符若

鼎若玦 右宗慈七子

四十八代端友若蒙子字子交宋崇寧三年襲封衍聖公端友於建炎初偕叔父孔傳姪孔玠扈從高宗南渡寓三衢終知柳州 玠端操第四子繼端友上賜玠田五頃供祀權以衢州學為祠堂玠生搢搢生文遠文遠生萬春萬春生洙俱宋襲封於衢至元始罷封 端操端

蕪皆端友弟 端本端裕端民皆若虛子 端弼端雅

端稟端立皆若愚子 端中端申皆若拙子 端節朝

散大夫 端夫端義端臣端智端直端慤皆若升子

端朝若升子為若谷後宣和四年始以幸學賜第仕至

臨江軍 端問仕至奉新丞著沂川集 端守端已侍

杉溪渡江歷官五十年介潔不阿年八十一 端位常

德府錄參 端植武康丞端隱江陵察權皆傳之子

松恢之子宣義郎 淵將仕郎與潛皆惇之子堯忱之

子承議郎 端言端行端拱皆若訥子 端甫以金党

懷英薦特賜及第除將仕郎小學教授見選舉門

四十九代名興二年襲封衍聖公 珣璋致皆端操子

行可璨皆端已子俱以學行稱皆奉祠壽俱八十

璋端位子奉祠年九十 琢玲瑞琰璿植之五子右南派

四十九代璠字文老端操子廢齊阜昌二年襲衍聖公金

天眷三年復封卒年三十八右北派

五十代播玠子襲封衍聖公 珪瓌瑀 璜知和州 瑛

璠琇 璠蘭溪簿 璠左藏庫 璠迪功郎 璠迪功

郎 璠簿尉 璠從事郎 璠漳州缺 珉迪功郎

珣迪功郎浙江帥參牧 持天富塲 揆將仕郎 拂

揆檻掖哲擇揆搏抑 攄迪功郎 撫掾括 元龍好

學從真西山游進書克柯山精舍山長 從雲聖時總

揀援 拱篤學有文集 搏復之捷揮南名從玉旁者

恐皆為玠之兄弟非玠之子姪也今皆列于五十代中必有差謬姑存其疑

五十代拯璠子字元濟金皇統二年方七歲襲封衍聖公加文林郎尋卒年二十八無子以弟總繼總字元會金大定三年襲封衍聖公卒年五十三北派

五十一代文遠襲封衍聖公歷吉州隆興府通判 文述

文邁防護鄉井補官 文逸博學 文迥文邁文適文

懋文郁文恭文遜文志文澄應選應發同鄉舉出官

文滋文通文達 應得元龍之子淳祐元年臨雍賜第

守台州有德政 應符應僖應祥 文模登寶祐元年

第知湘潭 文進文適文振文敏鄉舉 文質文彬南派

五十一代元措搃之子字夢得金昌明二年襲封天興間

金歸附于元仍舊襲封無子以姪之庶子須嗣爵亦無

子以從祖元孝弟元用襲封元用字俊卿宋寶慶元年

襲封年五十三北派

五十二代萬春襲封衍聖公 萬齡肇慶府推官 萬鈞

萬鎰皆文遂子 萬程萬里萬頃皆文邁子 萬榮萬

崇文逸子 萬善萬古萬嘉文迥子 德祖嗣祖文邁

子 和孫監試文志子 萬祐萬全隆孫萬石萬裕萬

中延詠謨言詔諤增萬憲萬東萬同萬有孔子嫡派許

赴國子監試始于淳祐十二年七月蔡察院奏請補

五十二代之厚元孝子也贈魯郡侯自元措傳襲以來嫡

長乃元孝元孝生之厚之厚生浣三世讓衍聖公爵不取誠至德也之全字工叔元乙酉父元用從太師國王征益都權襲封衍聖公癸巳年元用自汴還東平仍襲封之全止克曲阜令壬子年權授襲封衍聖公降印信

蕪曲阜令卒年五十一生子治

北派

五十三代洙襲封衍聖公常添差通判平江府 泗萬齡

子 沂萬程子 演瀾淵津言之四子 敬山不知所

生至大中充渑江書院山長世其職

南派

五十三代浣字自新追封魯郡侯生思晦 治字世安元

壬子年代父克曲阜令權主祀事貞元中襲封衍聖公

生子思誠

右關聖譜系元豐八年四十六代孫宗翰始以舊譜錄

板紹興二年四十八代孫端朝逃虜難南奔平生所資

皆失之獨此譜山人得之轉以見歸因為序錄紹興

五年洪興祖守廣德軍刊於郡齋景定三年五十一代

孫應得令台州太守時差添廣德軍判又附入紹興五

年以後至景定三年云

自五十四代以後罷衢州襲封

五十四代思晦字明道按宗譜先宗愿生若愚若愚生端

立端立生琥琥生拂拂生元孝元孝生之厚之厚生浣

浣生思晦元仁宗延祐三年襲封衍聖公鑄四品印泰

定四年改從三品印卒年六十七謚文肅生子克堅

五代時孔末之後欲以偽亂真宣聖子孫被其殘害幾盡至是其裔復欲冒稱宣後思晦以為不早辨則真偽久益不可明彼與我不共戴天乃列于族與其拜殿庭可乎遂會族人稽故典斥之既又重刻宗譜於石而孔氏族裔益明矣

五十五代克堅字璟夫元至元六年襲封衍聖公賜秩二品改授銀章二十八年我太祖詔入朝待以賓禮

洪武三年卒年五十五子九人長希學二十五年襲封衍聖公

洪武元年仍令襲封卒年四十七
七代訥字言伯元順帝年襲封衍聖公 洪武癸未

丁父憂丙寅受 誥仍襲封庚辰卒年四十三
宋元聖裔

宋 理宗寶慶元年克平山東以孔子五十一世孫元用權襲

封衍聖公仙源令二年改濟州通判兼京東西路安撫使主管機宜文字時嫡孫元措從金宣宗遷汴

元 太祖時木華黎統諸道兵至山東承制封拜以元用權襲

封衍聖公世襲曲阜令給降衍聖公印 又贈孔子五

十二代孫之厚亞中大夫濟寧路總管輕車都尉魯郡侯 乙酉年元用從木華黎征益都以其子之全權襲

封衍聖公曲阜令

太宗癸巳年元措自汴還仍襲封衍聖公之全止充曲阜令

憲宗壬子年宣差之全東平路行軍萬戶總管管民長官

依奉牙魯花赤衆斷事言語權襲封衍聖公降到印信

兼曲阜令 是年又贈五十三代孫浣中議大夫太常

禮儀院同僉上騎都尉追封東平郡伯再贈通議大夫

禮部尚書上輕車都尉追封魯侯 又令五十三代孫

治補父之全缺充曲阜管民長官

世祖中統元年改治曲阜令四年令權祀事 至元十三

年授治承事郎曲阜令兼管諸軍與魯仍權祀事 二

十三年授治奉訓大夫單州防禦使二十九年又授奉

直大夫密州知州

成宗元貞元年治赴闕朝見特授中議大夫襲封衍聖公

爵一品散官四品給四品俸

仁宗延祐二年勅中書省定議孔子五十三代孫當襲封

衍聖公者以名聞 三年授五十四代孫惠晦中議大

夫襲封衍聖公

泰定帝泰定四年改思晦嘉議大夫

文宗至順二年改鑄三品印與思晦卒贈通議大夫河南

河北等處行中書省叅知政事護軍追封魯郡公謚文

肅

順帝至元六年授五十五代孫克堅嘉議大夫襲封衍聖公
公 至正六年以五十六代孫希學襲封衍聖公 八
年制授克堅中奉大夫易以銀章 十四年徵克堅為
同知太常禮儀院事遂拜治書侍御史辭歸追拜山東
廉訪使受詔復辭歸會山東亂北行抵藁城召入為集
賢直學士 十九年遷克堅禮部尚書出為西臺侍御
史復召拜國子祭酒謝病歸又起為集賢學士元亡與
子希學受恩 太祖尤厚

皇明聖裔

第五十五代克堅字景夫思晦子後至元元年襲封衍聖
公六年進階中奉大夫從二品賜銀印召為同知太常

禮儀院以子希學襲公爵拜中臺治書侍御史改山東
道肅政廉訪使起為集賢直學士改禮部尚書知貢舉
遷陝西行臺侍御史改國子祭酒謝病歸召為資善大
夫集賢學士再起山東廉訪使俱不赴 洪武元年召
至京師待以賓禮而不名俾食公祿不視事卒年五十
五

第五十六代希學字士行克堅子後至元十五年克堅拜
同知太常禮儀院以希學襲爵兼秘書卿洪武元年
詔襲封改 賜階資善大夫正二品別給銀印每入朝
班亞上相予 誥還其祭田備禮器樂器樂舞置屬官
管勾典籍司樂各一員每至京中使慰勞館饋殊等卒

年四十七 賜祭

第五十七代訥字言伯希學子洪武十七年襲封衍聖公
詔不稱資善大夫以王軸 誥文給之時革丞相每
入朝令列文臣首 賜一品金織衣 誥命白玉軸每
入 覲給符乘傳庚辰卒年四十三 賜祭

第五十八代鑑字昭文訥子洪武三十三年襲封衍聖公
又明年卒年二十三 文皇帝遣使致祭

第五十九代彥縉字朝文鑑子十歲襲封衍聖公每入
朝仍列文臣首洪熙元年 賜第東安門北 景皇帝
視學召入觀禮 賜金箱犀帶大紅鶴袍三年來朝復
賜三臺銀印織金麒麟服白玉束帶卒年五十五

論祭治喪葬賻卹優厚

第六十代承慶字永祚先卒年三十一後追封衍聖公

第六十一代弘緒字以敬承慶長子景泰六年年八歲襲
封衍聖公 賜鶴袍玉帶如例以其軀小去二勝俾藏
之以爲榮又範金爲圖書以 賜之其文曰謹禮崇德
天順元年入 朝見便殿 上握手置膝上改 賜
大第成化中坐奸淫殺人法當斬 詔以宣聖故削爵
爲民弘治中復冠帶卒年五十七

第六十一代弘泰字以和承慶次子成化十七年代兄弘
緒封衍聖公 憲宗朝加先聖廟祭禮樂 孝廟初幸
太學俱 詔入觀禮 賜襲冠帶如例又改 賜第於

續文獻通考卷之五十八 四百〇三折
慶壽寺之北卒年五十有四 賜諭祭者五工部官屬

治葬

第六十二代聞韶字知德弘緒子也弘泰卒法當聞韶襲以弘治十六年封衍聖公 上賜麒麟服白玉帶黃金盆正德年 幸太學召入觀禮 賜宴冠服靴帶寶鈔如故事嘉靖初 上兩幸太學召 賜亦如之卒年六十有五 賜祭葬加禮

第六十三代貞幹字用濟聞韶子嘉靖二十五年襲封衍聖公 賜勅約束其宗人以入 朝卒年三十有八

上命禮部尚書 賜祭凡九工部治葬行人護喪

第六十四代尚賢字象之貞幹子嘉靖三十五年以父貞

幹卒京師即 命襲爵時方穉齒 勅山東撫按諭其

族人謹視之不爾治以重罪

第六十五代胤椿尚賢子隆慶元年吏部覆郭諫臣奏衍聖公或遇親喪仍令守制其襲封一事所司代為奏請令其守護印信候服滿起送承襲服內免其入賀

聖裔居溫考

按宋淳祐中于溫之府城西南建永嘉書院中奉宣聖燕居像而孔裔居溫不知所自舊考自檜始檜子奕奕子源源子實實子會會子公志公志子師古師古子炳炳子貴敬貴敬子潼孫潼孫子文升至 洪武中平陽孔克表以博學篤行薦為翰林修撰則孔子五十五世

孫也

曲阜世尹考

皇明崇厚孔裔極其優渥在曲阜者襲封衍聖公之外復世襲曲阜縣令一人以約束其宗人正德中復以六十二代孫聞禮為翰林五經博士世襲以奉子思後在衢州者復官其長嫡一人世襲五經博士然皆不使治事蓋不欲以更議繩聖人之後 本朝之崇聖裔過先朝

遂矣

以世尹以衍聖公兼者唐文宣公萱兼泗水令昭倫兼早令後唐仁王兼曲阜令宋延世兼曲阜令聖佑兼泗源縣事金衍聖公總兼知曲阜縣事元措兼世襲

曲阜令元用兼仙源令份宋遙授元仍兼曲阜令

專授者宋四十四代勗曲阜令四十五代道輔四十六代宗楨四十五代彥輔四十六代宗翰四十六代舜亮四十六代宗壽俱知仙源縣令五十五代克昌五十四代宗愿俱曲阜令元五十三代濟五十三代治五十四代思凱五十四代思誠五十五代克欽五十六代希章俱曲阜尹

國朝五十六代希範五十五代克中五十八代公鏜五十七代澳五十八代公錫五十八代燮五十六代希永五十九代彥士六十大代承泗六十大代承夏五十八代公統六十大代承震五十八代公珏五十八代公澤六十大代承

業六十一代弘廊六十大代承厚六十一代弘復俱曲阜
縣知縣內燮陞兗州府通判弘復陞濟寧州知州俱仍
領縣事希大克仲克當希範克中公鏜領 勅

五經博士考

皇明正德中以孔子六十二代孫聞禮為翰林院五經博
士奉子思後聞禮卒弟聞詩代聞詩卒聞韶之子貞寧
代 弘治中以衢州長嫡一人世襲五經博士 萬曆
二十二年十月吏部奏覆衍聖公次子孔胤桂授五經
博士

顏子生歆歆生儉儉生威俱魯大夫威生芄芄生億億生
祐俱下大夫祐生卸秦大夫卸生譽舍人譽生產項羽

聘之不受產生異漢大夫異生愚卿士愚生遠大夫遠
生緯一作肆書傳作駟武帝時尚書郎緯生衷一作忠
鞏令衷生凱張禹薦於朝凱生遠郡上計吏遠生龔州
舉茂才龔生綽綽生準始仕為從事復高尚不仕準生
阮舉有道不起阮生亮郡功曹亮生敷州舉茂才二子
斐盛斐京兆尹有善政二子魯歡無傳盛漢尚書郎魏
關內侯始自魯國徙居瑯琊臨沂盛生欽明詩禮易尚
書多所通說學者宗之爵葛繹縣子謚曰貞欽生默襲
葛繹縣子三子畿輦舍長次無傳舍歷官光祿勳晉成
帝美其素行加右光祿大夫致仕謚曰靖舍生髦惇於
學行襲爵西平縣侯加秩光祿勳謚曰定髦生緄州西

系文獻通考卷之五十一
四百七十浙
散騎都尉西平縣侯絳生靖之御史中丞靖之生騰之
善草隸書有風格歷巴陵太守二子興之炳之興之安
寧太守生子登梁鄱陽王府郎中令無傳炳之歷奉朝
請員外散騎常侍生子見遠博學有志行正色立朝高
祖受禪不食發憤痛哭而絕武帝恨之曰我自應天從
人何預天下人事而顏見遠乃至如此歷治書御史兼
中丞見遠生協湘東王右常侍領西記室撰晉仙傳日
月災異圖文集等書事具梁書生子之儀之奇之推之
儀周同麟趾學士御正大夫平陽縣公隋文輔政不署
矯詔索璽書又拒之出爲集州刺史新野郡公事具周
書二子冠祖無傳弟之奇亦無傳次弟之推隋太子文

學著家訓二十篇寃魂志三卷證俗音字五卷文集三十
十卷事具本傳之推生思魯博學善屬文尤工訓詁嘗
與劉臻講論經義臻屈服焉唐拜儀同秦府記室思魯
生師古太宗即位拜中書侍郎琅琊男遷秘書少監奉
詔校定經史修五禮成進爵子終秘書銀青光祿大夫
弘文崇文兩館大學士從征遼道卒謚曰戴師古生趨
庭吉州刺史趨庭生尚賓下邳令尚賓生鼎生迢迢
生傳贄傳贄生旻旻三子長君則無傳次君佐君雅君
佐金鄉丞子文威五代時隱魯之嶧山號虛中先生文
集傳於世文威生承祐承祐二子長崇德無傳次仲昌
宋太宗淳化二年講五經賜第仕終南京判官仲昌生

太初南京國子監說書號鳧嶧先生文集傳于世太初
 生復東魯名儒嘗為國子監直講出為臨晉簿嘉祐中
 訪有道儒士京東部使者以復應試命為校書郎知永
 康縣擢太常博士乞詔禮官考正祀典遷吏部員外郎
 時孔宗翰乞尊奉孔子祠復因上五議一曰專其祠享
 二曰優其田祿三曰復其廟幹四曰司其法則五曰訓
 其子孫朝廷多從之元祐中為起居郎兼侍講以天章
 閣待制充國子祭酒卒以次子岐執政贈太師生六子
 嶢岐嶠嶧嶢嶢承務郎此支自嶢以下建炎時俱南
 徙而君雅一支世居陋巷故宅君雅二子文藹文鐸文
 藹生涉父子鄉貢進士涉四子俱無傳文鐸生行戶部

尚書行生檉檉生端端生繼進士繼生昌昌生擎擎生
 价价生順順生寶寶生椿椿生之美元東明縣尹之美
 生池三氏學教授池生拳拳生希仁希仁生議
 皇明成化中授翰林院五經博士世襲初景泰二年授希
 惠翰林院五經博士後以不係嫡派罷黜至是授議議
 生公鉉鉉生重德重德生從祖從祖無傳以重禮長子
 肇先嗣俱襲職重禮未詳所出肇先生嗣慎隆慶六年
 正月襲
 曾子生元申華三子皆賢公行子之子燕遇元于道曰燕
 君何如元曰志卑志卑者輕物輕物者不求助苟不求
 助何能舉氏羗之虜也不憂其係也而憂其不焚也利

夫秋毫害靡國家然且為之幾為知計哉元生西與或
 人問答之言見孟子西生欽欽生尋尋生羨羨生遐遐
 生偉偉生樂前漢封都鄉侯樂生冕冕生旃旃生嘉嘉
 生寶寶生琰琰生據漢末王莽篡逆耻仕遷豫章廬陵
 郡之吉陽鄉即今吉安府永豐縣遷鶯鄉地名睦坡也
 據生闡闡生植植生耀耀生培培生德德生珣珣生渙
 渙生梓梓生勰勰生端端生鉉鉉生海海生橫橫生興
 興生隆隆生鈞鈞生謀謀生丞丞生珪珪生寬寬生莊
 莊生慶慶生禕禕生輝輝生四子崇崇崇德崇鄴崇
 禎三子之後流離無踪惟崇德傳三代孫中行徙居古
 巷五代孫朝陽仍居睦坡次孫載陽徙居新陂是為龍

潭之祖傳十二代孫晞顏宋末為監察御史生雷順德
 裕巽申並仕元雷順為萬載縣尹德裕為翰林直學士
 巽申為應奉翰林文字德裕嘗建武城書院于龍潭地
 方自推賢者一人主領教事置有祭田百畝吳文正公
 澄為記德裕曾孫是為 國朝學士祭副使鼎傳生見
 充永豐縣學生員蒿衮兄弟等駢生耀遷居木塘耀生
 崇範唐拜太子洗馬東宮使崇範生延膺延膺生碩碩
 生承昌承昌生萬敵萬敵生公整公整生九思九思生
 文傑文傑生好古好古生尚忠尚忠生敬甫敬甫生元
 德元德生价翁价翁生汝霖汝霖生崇文崇文生利賓
 利賓生輔世輔世輔志輔志生德曾曾氏題疏云利賓

生輔智輔智生德胄與充志異德胄生奮用奮用生質粹

皇明正德間山東僉事錢宏訪得曾子之後一人於嘉祥深山中未請於朝後竟湮沒嘉靖十二年吏部侍郎顧鼎臣奏准訪求曾氏嫡派得嵩亮兄弟以生長南方不樂北徙惟質粹肯行後授質粹翰林院五經博士世襲

孟子生罽宇仲子受學於公孫丑著書論詩毛萇詩傳中嘗引其語云趙岐註以仲子爲孟子之從昆弟朱子亦以爲第三遷志以仲子爲子罽爲孫未知孰是罽生寓寓生舒漢高祖九年爲雲中太守愛士卒士卒戰死者

數百人田叔稱爲天下長者文帝曰賢哉孟舒復召守雲中舒生之後之後生昭博覽經史爲博士昭生但受易王同武帝時爲太子門大夫但生卿授經后蒼疏廣世傳后氏禮疏氏春秋皆本於卿卿生喜從田王孫受易故有孟氏易傳於世宣帝時舉孝廉拜爲郎遷曲臺署長喜生鏹鏹生興爲尚書興生嘗舉茂才拜徐令遷合浦太守有去思桓帝時楊喬薦之竟不受嘗生展展生穢靈帝時爲太常後爲太尉穢生敏博學能文靈帝時三公俱辟並不屈敏生光無書不覽昭烈定蜀拜議郎後主踐祚累遷大司農光生康魏明帝時爲散騎侍郎後轉爲監封廣陵亭侯註漢書康生宗避吳主皓字

改諱仁性至孝母老病篤冬月思笋食宗泣竹笋生作
羹食母病即愈寶鼎中爲司空宗生揖晉惠帝朝爲廬
陵太守揖生觀解天文爲殿中郎觀生嘉性冲默有遠
量成帝時舉秀才爲大將軍桓温叅軍温重之穆帝時
以脚疾不仕詔使扶入見之其優禮如此嘉生懷王從
宋武帝定建業以功封鄱陽縣五等侯後封陽豐縣男
位江州刺史南中郎懷王生表仕齊爲馬頭太守元魏
孝文帝時據郡歸魏賜爵譙縣侯後封汶陽縣伯歷濟
州刺史謚曰恭表生斌爲右丞斌生威閔帝除大鴻臚
卿威生恂恂生儒儒生景事隋煬帝爲鷹揚郎將景生
善誼恭帝時爲河內通守善誼生誼唐中宗朝擢進士

後拜同州刺史致仕睿宗召之以老固辭有食料本草
傳于世誼生大融大融生浩然少好節義喜賑人患難
玄宗召問其詩浩然自誦所作詩至不才明主棄上曰
卿自不求仕朕未嘗棄卿奈何誣朕因放還浩然生雲
卿肅宗朝爲校書郎雲卿生郊以詩鳴於世年五十得
進士第憲宗朝鄭餘慶鎮興元奏爲叅謀卒謚曰貞曜
先生郊生韋謙爲侍御史安州防禦兵馬使韋謙生遵
慶遵慶生瑄元和末召不仕瑄生方立僖宗朝爲昭義
節度留守方立生承誨事後晉少帝爲太府卿承誨生
漢卿事後周世宗爲左羽林大將軍漢卿生貫工詩貫
生昶昶生公齊公齊生寧宋仁宗景祐四年孔道輔守

兗州訪孟子後得寧後薦於朝授鄒縣主簿寧生堅德
學俱優特授徐州知州堅生寬寬生欽欽生津津生德
義元進士授魚臺縣尹辭秩德義生允祖允祖生惟恭
惟恭生之訓莒州學正之訓生思諒鄒縣主簿思諒生
克仁克仁生希文

皇明景泰二年授翰林院五經博士世襲希文生元元生
公肇事繼母孔以孝聞公肇致任弟公蔡襲自孟子至
公蔡兗州府志稱五十七代三遷志稱五十八代 萬
曆二十九年翰林五經博士孟彥璞卒以子孟承光襲
朱子婺源人生子三塾塾在皆以廕補官在紹定中為吏
部侍郎朱子平生所為文皆其類次塾生鑑湖廣總領

隨季父在由建寧遷居建安之紫霞洲鑑生浚官至右
文殿修撰兩浙轉運使丙子元兵至福安州浚不屈死
之生子林元其肅儒學提舉林生炯炯延平府照磨炯
生墜墜生鎔鎔生泮泮武平縣主簿生子堂堂生鑾鑾
生淞淞生挺

皇明景泰壬申 詔授翰林院五經博士世襲以奉祀事
挺生燉燉生學以上世居建安嘉靖三十七年婺源于
孫請乞如建安例於是復以守婺源祠十一世孫墅廕
錄博士 萬曆二十四年十二月禮部覆宋儒朱熹十
三代孫朱德洪銓註翰林五經博士職銜回籍奉祀

聖賢封爵

魯哀公十六年夏誅孔子曰尼父 漢平帝元始元年

追謚為褒成宣尼公 和帝永元四年封褒尊侯 後

魏太和十六年改謚為文聖尼父 後周大象二年詔

封為鄒國公 隋文帝贈先師尼父 唐太宗貞觀二

年升為先聖十一年詔尊為宣父 高宗乾封元年追

贈為太師 武后天授元年追封為隆國公 玄宗開

元二十七年追謚為文宣王 宋真宗大中祥符元年

詔加謚為玄聖文宣王 五年以玄字犯聖祖諱改謚

為至聖文宣王 元武宗大德十一年詔加封為大成

至聖文宣王 皇明謚號俱仍元舊至 嘉靖中始改稱 至聖先師孔

子

配享四賢封爵

顏子 唐高宗總章元年詔贈太子少師 睿宗太極元

年加贈太子太師配享孔子廟 玄宗開元二十七年

贈兗國公 宋真宗大中祥符二年封兗國公 元文

宗至順二年加贈復聖公

曾子 唐總章元年詔贈太子少師 睿宗太極元年加

贈太子太保配享孔子廟 玄宗開元二十七年贈郕

伯 宋真宗大中祥符二年封瑕丘侯政和元年以丘

字犯 先聖名改封武成侯增封成侯 咸淳三年升

郕國公配食大殿 元文宗至順二年加贈宗聖公位

次顏子

子思 宋徽宗崇寧元年封沂水侯 度宗咸淳二年升封沂國公配食大殿 元文宗至順二年加贈述聖公孟子 宋元豐六年追封鄒國公 七年詔配享先聖位次 元文宗至順二年加贈亞聖公

宋初顏孟配享並列于先聖左後升曾子子思又並列先聖左而虛其右不以相向太學博士陸鵬升嘗云初制顏孟配享左顏而右孟熙豐新經盛行以王安石為聖人歿而躋之配享位顏子下故左則顏子及安石右則孟子未幾安石壻蔡卞當國謂安石不宜在孟子下遂安石於右與顏子對而移孟子位第三次顏子之下

當時乃有如此優人土大夫愧死入地矣

遂左列顏孟而右列安石又未幾蔡卞再欲升安石壓顏子漸次而升為代先聖張本優人李氏以藝諫殿下託一大言之士戲薄先聖顏子出爭之不勝子貢出爭之不勝子路出而盛氣爭之又不勝公冶長旁視無言子路乃擊其首而叱之曰汝何不一力爭且看他人家女壻蓋蔡卞安石壻而公冶長先聖壻也蔡卞聞之遂不敢進安石于顏子上顏孟左而安石右遂為定制南渡後安石罷配享宜遷孟子以對顏子如舊制議者失於討論故安石既去其右遂虛而顏孟並列於左岳珂嘗記其事後增曾子子思又並列於左亦未有討論至我朝而分列始定

皇明國初四配封爵俱仍元舊至 嘉靖中始改爲復聖

顏子宗聖魯子述聖子思子亞聖孟子

從祀十哲封爵

東哲五位

費公閔損字子騫魯人唐元宗開元二十七年贈侯宋

真宗大中祥符二年加封瑯琊公度宗咸淳三年改封

費公

薛公冉雍字仲弓伯牛之族唐贈薛侯宋真宗祥符二年

加封下邳公度宗咸淳三年改封薛公

黎公端木賜字子貢衛人唐贈黎侯宋真宗大中祥符二

年加封黎陽公度宗咸淳三年改封黎公

衛公仲由字子路沂人唐贈衛侯宋真宗祥符二年加封

河內侯度宗咸淳三年改封衛公

魏公卜商字子夏衛人唐贈魏侯宋真宗大中祥符二年

加封河東公度宗咸淳三年改封魏公

西哲五位

鄆公冉耕字伯牛魯人唐贈魯侯一作鄆侯宋真宗大中

祥符二年加封東平侯度宗咸淳三年改封鄆公

齊公宰予字子我魯人唐贈齊侯宋真宗大中祥符二年

加封臨淄公度宗咸淳三年改封齊公

徐公冉求字子有仲弓之族唐贈徐侯宋真宗大中祥符

二年加封彭城公度宗咸淳三年改封徐公

吳公言偃字子游吳人唐贈吳侯宋真宗大中祥符二年加封丹陽公度宗咸淳三年改封吳公

陳公顥孫師字子張陳人唐贈陳伯宋真宗大中祥符二年加封宛丘伯度宗咸淳三年改封陳公升十哲位

皇明十哲封爵俱仍元舊至嘉靖中始改爲先賢某子從祀諸弟子封爵

唐開元二十七年詔贈曾參郈伯今升顥孫師陳伯今升

澹臺滅明江伯一宓子賤單伯二原憲原伯三公冶長

莒伯四南宮适郊伯五公哲哀郈伯六曾點宿伯七顏

路杞伯八商瞿蒙伯九高柴共伯十漆雕開滕伯十一公

伯寮任伯十二司馬耕向伯十三樊遲凡伯十四有若卞伯十五

公西赤郈伯十六巫馬期即巫馬施鄆伯十七梁鱸梁伯十八

顏辛蕭伯十九冉孺紀伯二十曹卹曹伯二十一伯虔鄆伯二十二

二公孫龍黃伯二十三冉季字子產東平伯二十四秦商字

子南少梁伯二十五漆雕哆字子歛武城伯二十六顏高字

子驕瑯琊伯二十七漆雕徒父須句伯二十八壤駟赤比徵

伯二十九商澤睢陽伯三十石作蜀成紀伯三十一任不齊任

城伯三十二公夏首元父伯三十三公良孺東牟伯三十四后

處營丘伯三十五秦冉字子開彭衙伯三十六奚容箴下邳

伯三十七公肩定新田伯三十八顏祖臨邑伯三十九鄆單銅

鞮伯四十句井疆淇陽伯四十一罕父黑乘丘伯四十二秦祖

上洛伯四十三申黨郟陵伯四十四公祖句滋字子之期思

伯四十 榮期零婁伯四十 縣成鉅野伯四十 左人郢臨

淄伯四十 燕役漁陽伯四十 鄭國榮陽伯十五 顏之僕東

武伯五十 原亢字子籍萊蕪伯五十 樂欬眉平伯五十

廉潔莒父伯五十 叔仲會瑕丘伯五十 邾異平陸伯十五

六 顏何史記作顏輿開陽伯五十 狄黑臨濟伯五十 孔

忠汶陽伯五十 公西輿如重丘伯十六 公西箴祝阿伯十六

一 遽瑗衛伯六十 施之常乘氏伯六十 秦非沂陽伯十六

四 林放清河伯六十 陳亢穎伯六十 申棖魯伯七十 琴

牢南陵伯六十 顏噲朱虛伯六十 步叔乘淳于伯七十

唐會要止於公西箴其遽瑗以下九人以杜祐通典附

宋真宗大中祥符二年詔封 邾伯曾參瑕丘侯 陳伯

顓孫師宛丘侯 江伯澹臺滅明金鄉侯 單伯宓不

齊單父侯 二 原伯原憲任城侯 三 莒伯公冶長高密侯

四 郟伯南宮适襲丘侯 五 郟伯公皙哀北海侯 六 宿伯

曾點萊蕪侯 七 杞伯顏無繇曲阜侯 八 蒙伯商瞿須昌

侯 九 共伯高柴共城侯 十 滕伯漆雕開平輿侯 十一 任伯

公伯寮壽張侯 十二 向伯司馬耕楚丘侯 十三 凡伯樊須益

都侯 十四 卞伯有若平陰侯 十五 郈伯公西赤鉅野侯 十六 鄆

伯巫馬施東阿侯 十七 梁伯梁鱣千乘侯 十八 蕭伯顏辛陽

穀侯 十九 紀伯冉孺臨沂侯 二十 曹伯曹卹上蔡侯 二十一 鄆

伯伯虔沫陽侯 二十二 黃伯公孫龍枝江侯 二十三 東平伯

冉季諸城侯四 少梁伯秦商鄆城侯五 武城伯漆

雕哆濮陽侯六 瑯琊伯顏高富澤侯七 須句伯漆

雕徒父高宛侯八 北徵伯壤駟赤上邳侯九 睢陽

伯商伯鄒平侯十 成紀伯石作蜀成紀侯十一 任城伯

任不齊當陽侯十二 東平伯冉季諸城侯十三 東牟伯

公良孺牟平侯十四 彭衙伯秦冉新息侯十五 下邳伯

奚容箴濟陽侯十六 淇陽伯句井疆滏陽侯十七 少梁

伯秦商鄆城侯十八 邵陵伯申黨淄川侯十九 期思伯

公祖句茲郎墨侯二十 雩婁伯榮期厭次侯二十一 鉅野

伯縣成武城侯二十二 臨淄伯左人鄆南華侯二十三 漁陽

伯燕夜汧源侯二十四 滎陽伯鄭國响山侯二十五 東武伯顏

之僕宛句侯二十六 開陽伯顏何棠邑侯二十七 瑕丘伯叔

仲會博平侯二十八 臨濟伯狄黑林慮侯二十九 平陸伯邾

巽高堂侯三十 汶陽伯孔忠鄆城侯三十一 重丘伯公西

輿如臨朐侯三十二 祝阿伯公西箴徐城侯三十三 衛伯遽瑗

內黃侯三十四 乘氏伯施常臨濮侯三十五 清河伯林放常

山侯三十六 汧陽伯秦非華亭侯三十七 顛伯陳亢南頓侯

三十八 魯伯申張文登侯三十九 南陵伯琴牢頓丘侯四十

朱虛伯顏噲濟陰侯四十一 淳于伯步叔乘博昌侯四十二 崇

寧元年改封孔鯉為泗水侯

大觀四年詔封公夏首鉅平侯四十三 后處膠東侯四十四

公肩定梁父侯四十五 顏祖富陽侯四十六 鄒單聊城侯四十七

罕父黑祈鄉侯 秦祖馮翊侯 原充樂平侯 樂劾

建城侯 蕪潔胙城侯 政和元年改從祀先聖封邑

者瑕丘侯曾參改武城侯 宛丘侯顓孫師改潁川侯

襲丘侯南宮适改汝陽侯 楚丘侯司馬耕改睢陽

侯 頤丘侯琴牢改平陽侯

皇明國初封爵俱仍元舊至 嘉靖中改稱先賢某子

從祀諸儒封爵

宋 平詔封魯史左丘明瑕丘伯七十二政和改中都伯

齊人公羊高臨淄伯七十 魯人穀梁赤襲丘伯七十政和改

睢陽 秦博士伏勝乘氏伯七十 漢博士高堂生萊蕪伯七十

七十 九江太守戴勝楚丘伯七十改 河間博士毛萇

樂壽伯七十 淮南太守孔安國曲阜伯八十 中壘校尉劉

向彭城伯八十 後漢大司農鄭衆中牟伯八十 河南杜

子春絃氏伯八十 南郡太守馬融扶風伯八十 中郎將

盧植良鄉伯八十 大司農鄭康成高密伯八十 九江大

守服虔滎陽伯八十 侍中賈逵岐陽伯八十 諫議大夫

何休任城伯九十 魏將軍太常蘭陵侯王肅贈司空九十

尚書郎王弼偃師伯九十 晉鎮南大將軍開府儀同三

司當陽侯杜預贈司徒九十 豫章太守范甯新野伯九十

元豐七年詔荀况封蘭陵伯七十 楊稚封成都伯八十 韓

愈封昌黎伯九十

寶慶三年追贈太師朱熹為信國公紹定二年改封徽國

公

淳祐元年封周敦頤汝南伯九十張載郿伯百程顥河南

伯九十程頤伊陽伯九十並列從祀

景定二年封張栻華陽伯三百呂祖謙開封伯並列從祀

咸淳三年封邵雍新安伯九十司馬光改封鄆國公並列

從祀

皇明 國初諸儒封爵俱仍元舊至 嘉靖中改稱先儒

某子

續文獻通考卷之五十八終

